

東
華
續
錄

東華續錄

乾隆一百十三

臣王先謙敬編

臣周濟蕃恭校

乾隆五十六年辛亥春正月乙酉諭前據尹壯圖具奏督撫因有賠項派累屬員以致倉庫多虧小民興歎屢經降旨詢問尹壯圖全改其言虛譽朕愛民勤政及至詢其實事尹壯圖節次覆奏總不能指實一人一事因令慶成帶同赴山西直隸山東江南等省盤查倉庫俱無虧短是尹壯圖逞臆妄言其罪已無可追揆其初奏之意不過自揣才具甚庸學問又劣於尙書督撫不敢奢望而思藉此一奏或可內擢侍郎外用學政殊不知朕之用尹壯圖爲閣學原以雲南見無大員故爾不次升擢若論其才具學問於閣學已爲倖獲今尙欲妄思干進其希榮卑鄙之念朕早已灼見其

肺肝若謂其以建白沽讜直之名雖庸人亦知其不能出此惟伊
前摺內所奏各省多有虧空奏請盤查尙不得不謂之有所建白
但朕綜理庶務從不肯察察爲明五十餘年未嘗有特派大臣清
查倉庫者蓋緣偏聽一人卽恐其人藉端勒索查弊適足以滋弊
而督撫藩臬舉不足信何以委之地方重任至其所稱吏民蹙額
興歎之語則實造作無稽天良盡泯之言不可不辨試思我國家
列聖相承厚澤深仁洽於寰宇 聖祖仁皇帝御宇六十一年
普免天下錢糧二次漕糧一次 世宗憲皇帝十三年中整綱飭
紀內外肅清愛民實政不可殫述其時因籌辦西北兩路軍需未
暇議及普蠲之事迨朕續緒承庥臨御五十六年偏災賑恤蠲貸
頻施以及修築河工海塘捍衛民生所費何止萬萬而普免天下
錢糧四次漕糧二次爲數又不啻數千萬萬孚惠閭閻有加無已

朕歷觀史冊自勝國以溯漢初僅有漢文帝賜農民田租之半史臣已侈爲美談從未有如我朝普免正供再三再四者朕愛養黎元如傷在抱惟恐一夫不獲施惠猶以爲未足是以宵旰憂勞勤求民瘼迨今年逾八秩猶日孜孜無事無時不以愛民爲念雖底小康猶懷大惕從不肯矜言示惠朕嘗稱易象云有孚惠心勿問元吉實膺之心而見之詩文不啻再三也乃尹壯圖忍爲此蹙額興歎之言直似方今天下民不聊生不特誣及朕躬並將億兆黎民愛戴悃忱全爲泯沒故不得不將朕子惠元元之實政實心一爲剖析天下之民具有天良方將感悅之不暇亦何至怨譟繁興朝不謀夕乎茲如尹壯圖所言竟已民不堪命何以百數十年海宇清甯地方無事卽有王倫蘇四十三田五林爽文等一二亂民聚眾滋事亦無不立就撲滅民皆安堵若夫天下之大兆民之眾

貧富本屬不齊其中有拙於謀生自傷窮困者事所難免況國家承平日久生齒日繁物產止有此數而食用日漸加增康熙年間朕在沖齡時卽聞乳保等有物價昂貴度日艱難之語今又七十七餘年戶口滋生較前奚啻倍蓰是當時一人衣食之需今且供一二十人之用欲使家給人足比戶豐盈其勢斷有所不能若如經生迂腐之見拘執古制均其田疇限其服制必致貧者未富而富者先貧擾累紛紛適以釀亂卽如孟子云庖有肥肉廄有肥馬民有饑色野有餓殍又云內無怨女外無曠夫亦係當時啓導時君權宜立論而以事理度之則亦有未可盡信者試以廢有肥馬而論則當時七國縱橫兵車乘馬不能一日不備豈有徒步從征之理若以怨女曠夫而論則臨淄十萬戶卽全出齊宮怨女散之民間亦斷不能使無一夫無曠卽如唐太宗時偶因災祲曾放宮女

三千人所放若及一半則所留者仍有三千縱復全行遣出亦難使天下曠夫人皆有偶此所謂盡信書則不如無書也本朝恭儉相承惠民益下偶有行軍征討卽芻秣亦從不取之民間是以拓土開疆大功屢蕝雖用兵而民不知兵至於宮中嬪御以及給使女子合之皇子皇孫等乳嫗使婢約計不過二百人實從古宮闈所未有朕以躬行節儉爲天下先而太平日久戶口殷繁小民生計或有未能盡裕朕正以盛滿難居每懷兢惕更不能不時以愛民爲急也至見在綱紀肅清內外大臣實無敢有營私飢法者康熙雍正年間雖法度嚴明吏治整飭尙不免有明珠徐乾學索額圖噶禮隆科多年夤緣諸臣竊權交結而鄂爾泰田文鏡李衛亦尙有三家鼎峙之說自朕臨御以來大學士傅恆爲朕倚任多年恪恭奉職訥親亦爲朕所需用因貽誤軍機卽行正法而平日居

官並無貪黷之事也且近日總督中如福康安等爲朕信任之人畢沅與前任總督書麟李世傑輩均係素能辦事者有敢於公然角立門戶營私舞弊者乎其有貪婪不法如王亶望陳輝祖國泰郝碩諸人一經敗露無不立寘典刑天下各督撫當此吏治肅清之際卽有不肖之心亦必默化潛移豈敢以身試法夫各督撫如果品等項土貢令出產之州縣墊辦採買不能保其必無僞謂藉端賠項派累屬員則斷斷不敢爲此如尹壯圖所指之書麟二人則併此些微土貢亦可保其不令屬員代辦是以偶因公罪罷斥旋因人才難得仍皆用爲巡撫總之尹壯圖謬妄無知以盛額興歎之言誣及朕躬誣及百姓朕正不妨以謗爲規尙欲加恩寬宥但降旨詢問盛額興歎究屬何人或百姓道路之言不能指實而牧令官吏斷無不知姓名之理今尹壯圖覆奏竟敢以不能記憶

虛詞有心欺罔其咎實不可寬宥矣且見據伊奏出伊母年逾七旬留在雲南原籍伊卽來京候補之語竟是天奪其魄自陳不孝滇南距京萬里垂白老親未能迎養自當據實陳情留籍侍養乃竟戀職忘親棄之不顧尙得謂之人類乎尹壯圖不但無君而且無親人倫盡喪豈可忝居朝列玷辱縉紳尹壯圖著革職交與慶成押帶來京交刑部治罪俟定擬上時候朕再降諭旨將此通諭知之○丙申諭總兵張朝龍尙維昇出師安南陣亡前經降旨從優議卹均照提督例給與騎都尉又一雲騎尉世職本日兵部將張朝龍之子張文貴帶領引見襲職因念張朝龍尙維昇帶兵前赴安南屢著勞績迨後力戰陣歿奮不顧身尤堪嘉憫著加恩均賞給三等輕車都尉世職卽令伊等之子承襲用示朕褒嘉勇烈有加無已至意○阿必達因病解任調成策爲工部右侍郎以傳

森爲盛京工部侍郎

由副都統遷

○戊戌李綬卒以劉墉爲左都御史

吳省欽爲禮部右侍郎

由順天府尹遷

○甲辰調紀昀爲左都御史劉

墉爲禮部尙書

二月己酉諭前因尹壯圖奏督撫藉詞賠項勒派屬員倉庫遂致虧缺商民蹙額興歎節次降旨詢問令其據實指出並著慶成帶同前赴直隸山西山東江蘇等省盤查尹壯圖目擊各省庫項豐盈倉儲充足並無絲毫短缺而往來數千里內復見商賈士民安居樂業共享昇平實無地方官滋擾之事伊又全改其言自認爲愚謬妄談其於何處督撫貪黷何處商民嗟怨總不能指實一事一人輒以蹙額興歎之言誣及百姓其罪不能再爲寬宥因降旨將尹壯圖革職押帶來京治罪並將伊熱中干進戀職忘親及種種虛捏妄謬之處明白通諭矣茲據慶成押帶尹壯圖到京命大

學士九卿會同審訊尹壯圖俯首認罪將希榮卑鄙飾詞誑奏各實情逐一供吐大學士九卿照挾詐欺公妄生異議律問擬斬決在諸臣以尹壯圖如此乖謬不敬忠孝兩虧實堪共憤自應按律問擬卽不立寘典刑亦當發遣伊犁以示懲儆但朕於臣工功罪是非必期覈實若伊前摺內止以各省多有虧空奏請盤查備所查倉庫果有一二處虧短必將督撫藩司及該府州縣等重治其罪根問虧短之由嚴加究辦尙將尹壯圖予以獎擢是以未往盤查之先大學士九卿等奏請將伊革職治罪其時朕猶曲加寬宥未嘗交部也今卽盤查無缺所言盡屬虛誣而伊前摺內若無此商民蹙額興歎之言亦欲矜全格外乃尹壯圖造作無稽使小民等受我朝百數十年深仁厚澤尊親愛戴之忱盡行泯沒竟將熙皞之民誣爲朝不謀夕之狀則莠言惑眾其罪實無可解免雖摺

內所指係下吏怨及督撫小民怨及牧令而文理不通未能分晰
直似居今之世民不聊生朕實不受此言卽萬民孰無良心亦不
受此言也此而不加之譴斥仍令復任原官不特無以安天下百
姓之心而朕亦轉類矯情矣昔唐太宗之於魏徵徒以金帛賜資
沾納諫之名原非虛衷聽受試思唐太宗果從諫如流魏徵果直
言無隱則太宗闕德之事多矣卽納巢刺王妃時何不聞魏徵讜
言諫阻耶當時君臣之間相率爲僞不能相與以誠而竟能傳千
載美名實素所不取朕辦理庶務一秉大公至正從不肯飾虛文
以干譽而於臣工獲罪重輕處置悉歸平允尹壯圖摠拾虛詞妄
行瀆奏律以挾詐異議之罪原難寬予從寬而造作無稽汗驥良
民其罪更無可逭然朕孜孜求治兢惕爲懷從前彭元瑞呈進古
稀頌贊揚鴻業朕因作古稀說有以頌爲規之說今尹壯圖逞臆

妄言亦不妨以謗爲規不值遽加之重罪也尹壯圖著加恩免其治罪以內閣侍讀用仍帶革職留任八年無過方准開復並著將朕前後辦理原委權衡至當之處再行通諭知之○庚戌 上御經筵○癸丑李濟因病解任以吳璥爲河南按察使○以和琳爲內閣學士由給事中遷○戊午 御試翰林詹事等官擢阮元等二員爲一等餘留館升黜有差○辛未以周興岱爲內閣學士由翰林院侍講遷

三月乙亥朔諭戶刑二部題本以八十日爲限○戊寅 上啓鑾幸盤山○免經過地方本年額賦十分之三○命濬直隸永定河支河○甲申諭軍機大臣等據明亮等奏訪得薩木薩克見已勢窮及所稱那爾巴圖於今春遣人往伊犁欲來京恭請聖安等語前因那爾巴圖擊獲薩木薩克並未解送是以降旨明亮等如那

爾巴圖遣使請安著不必准行今那爾巴圖深自追悔始遣使懇
請來朝伊遣使至伊犁固不應卽爲准行但見在薩木薩克勢窮
在鄂羅陀依帕居住那爾巴圖苟欲贖前愆將薩木薩克擊解前
來亦可了結一事計那爾巴圖遣使至伊犁時保甯業已接任著
傳諭保甯如那爾巴圖遣使請安卽告來使以從前爾伯克那爾
巴圖果能恭順將薩木薩克擊解前來自必承受大皇帝厚恩惟
其未行解送而反釋放故當治罪大皇帝仍念那爾巴圖受恩多
年恭順奮勉恕其愚蒙並未加罪僅未准其遣使朝貢今遣使伊
犁亦未便准行但念爾伯克那爾巴圖因未獲恭請聖安甚屬惶
恐自知不能由喀什噶爾前往復使人繞道伊犁足見肫懇此次
暫准前往爾伯克誠感聖恩將薩木薩克擊解前來不惟准爾來
使進京大皇帝且必格外施恩如此曉諭一面奏聞一面卽於來

使內遣同一人令其傳諭其餘來使卽行送回○丁亥命濬山東
徒駭馬頰河及附近支河○辛卯 上還京師○癸巳諭軍機大
臣等安南國王阮光平於南旋後接奉硃批嘉獎並御書大壽字
荷包玉器等件具表恭謝情詞肫摯實皆出自衷誠披覽之餘實
深欣悅已於表內硃筆批示矣前國王所遣進京謝恩使臣朕因
其入關尙早程期尙寬該陪臣等毋庸急於跋涉降旨傳諭廣西
巡撫陳用敷令其知會前途緩程行走於七月交秋涼爽前赴避
暑山莊與蒙古王公等一同宴資此係朕特加體恤令得緩行赴
都不至途中冒暑勞頓及陳用敷接奉諭旨陪臣已過桂林卽不
必再令轉回徒勞往返乃陳用敷拘泥前旨輒令趕回省城殊屬
錯謬已降旨訓飭將陳用敷交部議罪並恐陪臣等不知原委見
巡撫既令起程忽又追回或致心生疑畏諭令陳用敷將此事情

節向陪臣詳悉告知令再將朕前後降旨飭諭緣由一併令該國王知之表內稱有廣西撫部院陳字據於陳用敷未經書名其意自屬尊重天朝但君前臣名汝既備列藩封與督撫大員同係臣子何有內外之分嗣後對朕之言均應直書督撫名姓用符體制汝益當恪恭侯服勵乃忠誠以期永膺渥眷所有硃批該國王表文仍著發交閱看該國王接奉此諭不必另行繕表謝恩副朕嘉惠遠藩優加體恤至意又諭陳用敷奏阮光平率到御批表文恩賜各件具表謝恩並將表文進呈朕披覽之下具見該國王語出衷誠深可嘉尙已於表內批示並將陳用敷拘泥前旨令該國使臣起回省城辦理錯誤業將該撫訓飭議罪緣由用寄信諭旨詳悉諭知阮光平該撫接奉後卽專員齎至鎮南關交該國王閱看並著知會阮光平以天朝凡有傳諭各督撫大臣事件俱用大學

士遵旨寄信字據上年國王在京瞻覲祝釐大皇帝會將寄信各督撫諭旨賜令閱看國王自已諳曉今此次諭旨大皇帝特令寄信頒示係屬格外優眷與內地督撫大臣視同一體大皇帝之於國王不啻家人父子實爲從來外藩未有之榮幸如此詳悉照會該國王自必倍加欣感也除將硃批表文及寄信阮光平諭旨發交陳用敷就近轉交外並諭福康安知之○甲午諭朕恭閱世祖章皇帝實錄內有直隸總督張元錫被麻勒吉呵辱自刎之事因取國史館所纂張元錫列傳詳加披閱內載張元錫於任直隸總督時值孫可望降附學士麻勒吉齎 敕往迎至順德府元錫出迓麻勒吉責其失儀加以呵辱元錫歸引佩刀自刺以家人救未絕經巡撫董天機奏聞 命學士折庫納往究並令赴京質對元錫具陳麻勒吉苛索陵辱情狀下九卿科道議將麻勒吉革職

旋經降級留任數月後元錫復自縊身死等語朕閱此情節當時開國之初滿漢臣工不無意存歧視此案自係袒護滿洲故於麻勒吉議從末減試思張元錫接見麻勒吉時若非任意需索肆行呵斥種種受辱難堪何至以總督大員遽爾輕生自刎迨赴京鞫對復未將伊屈抑之處爲之申理致張元錫含冤莫雪仍復自縊麻勒吉妄作威福情罪甚大設在此時朕必賞之重典決不稍爲寬貸至張元錫服官本朝並無劣蹟雖係明季庶吉士未經授職與曾任前明清要覲顏改節者不同非但不輯列入貳臣乙編並不應列入貳臣傳內乃國史館臣不加詳審輒與馮銓龔鼎孳諸人一例編輯該總裁亦不免存偏袒附和之見著飭行該館從前所辦諸臣列傳有身事本朝而在勝國時僅登科第未列仕版者均著查明改正毋庸槩列貳臣以昭信史朕彰善癉惡一秉大公

於偷生貪祿行同犬彘之流卽身後亦不能倖邀寬假而覈其事蹟實與貳臣有閒者則必明示區別使薰蕕不至溷淆如張元錫等地下有知固當銜戚於泉壤而天下萬世知朕於滿漢諸臣一視同仁褒貶悉歸至當益可曉然於激勸之大義也○丁酉諭據永保奏哈薩克汗幹里素勒坦遣伊子阿彌載來京瞻覲並將土爾扈特俄羅斯等情形籌畫具奏哈薩克汗幹里素勒坦於去歲遣伊弟多索里素勒坦恭祝朕八旬萬壽尙未回至牧所今又遣伊子阿彌載前來實因屢年受朕不次之恩淪肌浹髓感戴之心出於至誠實爲可喜永保因阿彌載幼小令其在路不必趕緊令於七月盡八月初間至避暑山莊所辦甚是又將土爾扈特喇嘛薩邁林傳述之語斟酌籌畫目今俄羅斯哈薩克土爾扈特等情形與朕所降諭旨昭合永保頗爲長進甚屬可嘉新疆得此曉事

可任之人實爲於事有益永保著加恩授爲內大臣賞戴雙眼花翎以示鼓勵卽頒賞頭品頂戴雙眼花翎大荷包一對小荷包四箇永保接受後益當感激朕恩於一切事體愈加奮勉○己亥以王慶長爲福建按察使由臺灣道遷○辛丑吏部議准湖廣總督畢沅奏湖北安陸一府地處荆襄要衝統轄荆門鍾祥京山潛江天門當陽六州縣幅員遼闊訟獄繁多爲楚省第一難治之區且沿江隄塍防護均關緊要該府治理頗費周章請將安陸府屬荆門州改爲直隸州知州以附近當陽並荆門府屬之遠安二縣撥歸管轄原設州同一員亦改爲直隸州州同經理各屬糧捕事宜從之夏四月己酉諭前年因參革府經歷沈甯仁署理鳳陽縣任內辦理災賑覈減銀兩一萬餘兩之多顯有侵冒情弊交前任巡撫陳用敷查辦嗣據該撫審明稱係多帶夫役濫用多費委無捏飾侵

吞之事將沈甯仁發往伊犁充當苦差並將各前任失察官分別
著賠業經照擬完案朕思沈甯仁以微員署理縣篆經管賑務浮
開銀兩該省自行覈減至一萬餘兩其爲藉端侵冒情弊顯然陳
用敷查審此案僅稱該員所派人役過多復延時日致例外多有
糜費並未將濫領冒銷之弊查出問擬發遣已屬從輕辦理案已
久定朕亦不加深究矣今因該旗查辦著賠之人有因濫賑覈減
之一語偶觀之不勝做惕朕自臨御以來迄今五十餘年勤求保
赤補助多方每遇偏災無不豫籌蠲貸偶值旱潦災祲不惜千百
萬帑金優加賑恤並每諄諭封疆大吏甯濫無遺不得稍存靳惜
務使部屋窮簷胥需實惠此天下臣民所共知共見者也因濫賑
而治罪者爲誰沈甯仁承辦賑務果能毫無欺隱惠及閭閻即使
多費帑金尙富加之獎擢茲覈減過多乃因其違例私用但非假

冒入己故從輕辦理耳若侵冒入己必當正法豈止發遣著賠乎
今軍機大臣及該旗部所辦不周竟稱因災賑覈減此語雖小不
用心之誤寫實大有關係朕不肯受亦不忍受也使天下後世謂
因多賑覈減治人之罪則朕爲何如主且此案正賑加賑帑項就
鳳陽一邑而論已費銀二十餘萬兩豈於此萬餘金而轉有所吝
惜覈減之理此案乃沈甯仁浮開銀數爲家人胥吏從中侵冒所
致是以將伊治罪特無入己之賊故未正法耳並非於災賑帑銀
嫌其多費也若如軍機大臣及旗部所稱因災賑覈減則以後各
省凡遇災傷地方官必豫存恐因賑覈減之心以致撫恤不周災
民失所其弊尙可問乎無知狂徒正可妄言謂朕爲吝賑不愛百
姓矣故此一語之失事雖小而所關者大不得不費辭此諭著通
行各省大小衙門各書一道永遠示儆知朕愛民不惜費也○乙

卯以戚蔭生爲福建按察使

由缺補道是

○甲子諭前因黎維祁投回

內地特令帶領屬下人等來京歸入鑲黃旗漢軍旗下授爲佐領賞給錢糧俾免失所伊自到京數月以來尙知安分上年冬間忽向該管都統金簡懇請仍回安南並請於安南之高平諒山宣光興化四處內酌給一處安插愚妄無知莫此爲甚茲據都統金簡奏稱黎維祁庸懦無能聽信黃益曉范如松阮國棟黎忻等教唆是以妄行瀆請而黎光睿二十名不領餉銀隨同告歸亦屬生事請將黃益曉等四名分別發往伊犁等處當兵食糧黎光睿等二十名分發江甯等處安插等語黎維祁自到京以來入旗受職恩加養贍乃敢聽信黃益曉等之言瀆請回國自應將教唆之人加以懲治已令將黃益曉等四名發往伊犁等處入伍當兵止准支食一半錢糧黎光睿等二十名不必發遣外省卽著發往熱河地

方安插著將辦理情形諭令該國王知悉並將硃批金簡原摺發給閱看至黎維祁弟妹妻妾及伊從人眷屬等尙在安南未經帶出前經降旨令阮光平查訪送出俾得家室完聚係朕格外之恩今黎維祁等如此不安本分不能承受朕恩竟不必將伊等眷口查送况黎維祁等進關以後迄今已及兩載婦女老弱經兵燹流離之後亦恐難於尋訪著傳諭該國王若此時業已訪得仍可遣送進關儘見在尙無消息竟可無庸查訪矣見屈天中令節該國王迎禧集慶諸事吉祥因思上年端節正值該國王入覲在途曾馳賜節賞一分今遠隔關廷朕心深爲廕注著照上年之例加恩賞給庫紗葛紗牙扇蕉扇十錦扇芙蓉巾香器藥錠等物並奶餅一匣隨旨發往用昭優眷將此諭令知之不必遣人謝恩○辛未諭前據福崧奏嚴維敬呈控各查圖領吏員執照捏行改籍一案

交刑部行提犯證審辦嚴訊代改籍貫之朱瀚究出彭良昇賄屬
該犯爲伊子頂買情節將彭良昇拘拏到案旋經彭元瑞具奏彭
良昇是伊親姪頂名舞弊實係不能約束並未將知情容隱之處
據實檢舉朕以彭元瑞身爲大臣渥受恩眷自不至庇護伊姪飾
詞具奏其咎亦止於不能管教子弟尙無大過昨據御史初彭齡
奏彭元瑞於此事早已知情及刑部審出之後始行具奏掩飾顯
有瞻徇取巧情弊並奏稱彭元瑞管理武英殿國子監事務上年
十二月武英殿校錄缺出咨取肄業生充補國子監即將伊婿饒
文震咨送旋以諸生嘖有煩言復令武英殿提調具文駁回實屬
徇私顛倒等語因命軍機大臣會同刑部即將此案一併審明定
擬具奏前據訊明彭元瑞於四月間已知彭良昇頂冒情弊卽欲
拏送刑部彭良昇以家有老母再三哀懇遂卽聽從容隱迨刑部

指名拘拏彭元瑞含混奏聞藉爲支飾彌縫之計彭良昇到案卽據供認不諱彭元瑞始自行認罪不能置辨至咨送伊婿饒文震充補校錄一節雖經武英殿駁回而國子監咨送原稟僅註明迴避字樣未經畫行仍未停止咨送而調查該衙門從前咨送校錄之稟無不畫行者是其徇私濫送之弊欲蓋彌彰無可解免奏請將彭元瑞革職覈其情罪實無可寬從前彭元瑞在浙江學政任內不能謹飭因係既往之事且無左驗是以不復深究仍行保全加恩錄用洊擢尙書近年以來頗知黽勉供職且念伊學業優裕甫用爲協辦大學士旋錫宮銜如此曲賜矜全恩施格外彭元瑞自當感激思奮益勵操修迺敢孤負朕恩徇私容隱非僅如近日諾穆親失察伊姪篤隆阿可比且此案刑部堂官皆有觀望之意獨阿桂一人飭辦耳卽阿桂和坤亦未必與彭元瑞情孚莫逆然

使伊果能謹恪自持無瑕可摘又誰得乘閒抵隙持其短長耶且不但阿桂和珅不能意爲好惡於朕前臧否大臣卽朕辦理庶務一秉大公有功必錄有罪必懲惟視其人之自取從不稍存成見而有所愛憎於其閒是彭元瑞此案不惟爲大臣者不能曲爲軒輊卽朕素以其文詞雅贍猶欲成全保護然一經敗露御史糾參軍機大臣等審訊得實自應按例懲辦亦不能稍爲迴護若再加曲宥爲大臣者竟可相率效尤無所畏忌何以儆有位而肅官箴彭元瑞具有天良卽令其清夜捫心亦何顏覩居顯秩耶本應卽照所議革職念其學問素優堪任編纂書籍之事姑免其全行斥退彭元瑞著革去太子少保協辦大學士吏部尙書仍加恩降授侍郎南書房行走予以自新而觀後效彭元瑞經此番懲戒之後儻再不知改悔定行從重治罪不能屢邀寬典矣至刑部堂官於

此案遲延觀望經阿桂嚴飭究問始行查出實情除阿桂外其餘各堂官均著傳旨嚴行申飭國子監堂官吉善等咨送饒文震雖詢無顯聽屬託情弊但彭元瑞既稱係伊至戚未經畫稟該堂官仍行咨送卽屬有心瞻徇吉善等俱著交部議處彭元瑞所遺吏部尙書員缺著孫士毅補授並協辦大學士事務其兩江總督之缺地方河務較繁一時不得其人因思書麟久任江南於該省地方河工尙稱諳練前以句容書吏侵蝕一案獲咎因其會飭所屬查辦尙非如閔鶚元之有心徇庇屬員者可比是以復棄瑕錄用自任山西巡撫以來尙知改過奮勉書麟著補授兩江總督其所遺山西巡撫員缺著馮光熊調補其所遺湖南巡撫員缺著姜晟補授姜晟屢經獲咎以其尙諳刑名屢加寬宥今於彭良昇一案亦不無觀望第因簡任乏人湖南事務較少是以復任封圻姜晟

抵任後若再不知振作改悔定行加倍治罪孫士毅卽著來京供職其印篆交與長麟署理馮光熊未抵任以前所有山西巡撫印務著鄭源璫護理姜晟未抵任以前所有湖南巡撫印務著王懿德護理朕綜理庶務黜陟臣工功罪權衡從不豫存成見大臣等若敢稍涉隱飾亦無不洞燭情僞罰當其辜茲特明白宣示申誡諸臣其各勉矢樸誠屏絕私意約束子弟勤慎奉公儻竟自蹈愆尤朕惟執法從事決不姑息是朕之小懲大誡正所以保全大臣庶不至敗檢縱恣轉罹重罪也所有頂冒吏員案內各犯著卽照議完結並將辦理原委通諭知之○壬申調景安爲山西布政使鄭源璫爲河南布政使○調張若淳爲刑部左侍郎吳省欽爲工部右侍郎以彭元瑞爲禮部右侍郎

五月戊寅定宗室王公等兼任職銜因事實降例○庚寅諭署理

江蘇巡撫長麟自棄瑕錄用以來查拏盜匪會匪嚴緝鹽梟等案
於地方一切事件辦理頗屬認真著加恩實授江蘇巡撫給還頂
帶仍著賞戴花翎該撫益當感激朕恩倍加奮勉毋致始勤終怠
以副朕格外加恩訓誨成全至意○乙未 上啓鑾秋獮木蘭○
免經過地方本年額賦十分之三○己亥諭尹壯圖前經降旨以
內閣侍讀用但念員缺甚少補授無期著加恩以禮部主事即用
○辛丑 上詣熱河 文廟行禮 上駐蹕避暑山莊

六月丁未諭軍機大臣等福康安等奏審明崖州拒捕戕官首夥
盜犯分別正法並拏獲盜首大辦三李廣才及各船拒捕夥犯二
十五名押解來省審辦等語所辦好此次緝獲首夥各犯之文武
員弁著福康安等查明開單咨部分別議敘以示獎勵又另片奏
阮光平接到接捕洋盜咨會即飭該國沿海各屯上緊巡哨並令

吳文楚爲水軍都督分布巡緝至此案盜匪前在廣南短棉農耐
地方竄匿因令該國協同緝拏今據該國王咨稱該國轄內並無
此等地名應再照會阮光平令其復行確查辦理等語阮光平接
到咨會派令吳文楚統率海艘戰兵分屯游徼實屬恭順可嘉吳
文楚爲該國王心腹得力之人特令爲水師都督接拏洋匪足見
阮光平爲內地除盜安良出於感激惻怛頗知以事爲事盡心調
度並非視爲海捕具文以一咨塞責其所稱該國境內並無短棉
農耐地名自非捏飾况廣南係阮岳所管之地聞阮光平向與阮
岳不睦恐有呼應不靈掣肘難辦之處亦未可定外洋島嶼沙洲
道里本屬渺茫地名多非的確非若藏匿內地盜匪必須確切挨
查一一窮究吹毛求疵可比福康安惟當以該國王實心敬事調
度有方綏輯海疆不遺餘力婉詞嘉獎而鼓勵之不必似內地以

獲犯無據之供責成該國於短棉農耐地方投求根緝轉令該國王難於措辦至吳文楚如果將盜首拏獲著福康安等卽行奏明朕當加以優賞卽其所屬土目人等有能拏獲盜匪者亦酌量加以賞賚俾令益知感戴見在盜首止有何起文一名未獲或仍知照該國王飭令留心緝捕其餘夥盜十六犯未獲止須嚴飭內地文武員弁認真嚴緝不必復令安南協捕於撫馭外藩之道較爲得體所有未獲盜首何起文一犯及盜夥王才高孔亞錫張亞四布亞往亞蘆亞妹亞九吳添帶頭蓬複大礮劉亞二陳亞二陳亞六張老二亞七亞勝等犯並另案洋盜孫維斌首夥人等著福康安等嚴飭根拏務期按名就獲毋使一人漏網將此由五百里諭令知之○戊申諭各省呈控重案著督撫親提審辦著爲令○乙丑諭福康安奏安南國王阮光平遣使續進表貢謝恩並將表文

進呈覽奏深爲嘉悅該國王於上年赴都叩覲回國後感戀交縈
卽遣陪臣陳玉視等齎表謝恩已令於七月二十五六日前抵熱
河加恩宴賚茲該國王復以萬里初歸爲時恩促修儀備物未能
竭盡悃忱且陳玉視進關之後又疊荷隆施愈覺感悚靡甯因再
敬備表貢遣使續齎進關情詞肫切忱悃可嘉而一種感恩戴德
之誠溢於楮墨自應准其齎進實收渥加賚予以示恩眷已另降
諭旨令陳用敷於該貢使行抵桂林時妥爲照料矣至另摺奏據
安南都督黎文認等來至江坪思勒地方投遞呈文內稱國王接
奉照會分委伊等帶領兵丁趕獲賊人殺斃二十餘人生擒二人
見在將擒獲二犯提省審辦等語阮光平恪守藩封認真緝捕並
令吳文楚爲水軍都督飭令夷目分投巡察奮力殲斃盜匪多名
並生擒二人解交內地足見該國王調度有方恭順將事實出至

誠此次擒獲盜匪係該國分巡夷目既據福康安等備具紬紗茶布銀牌等物派弁馳齎前往賞給此聞自無庸再與獎賚若將來吳文楚自行擊獲盜首著福康安卽行奏聞朕當加之優賚以示獎勵福康安等不必先行備物賞給也所有阮光平表文及福康安奏到二摺並著發鈔將此傳諭知之○戊辰諭軍機大臣等朕駐蹕熱河幾餘偶檢舊作有昨歲賜安南國王阮光平至避暑山莊陸見詩章憶及上年該國王萬里來庭情殷愛戴節經接見慰勞頻加宴賚而該國王恭順恪誠根於至性其感激依戀之忱不啻家人父子及陸辭回國朕復繫念不置屢賜上方品物優賚有加今屈指又將一載因用前韻特製詩章書扇以賜見在溽暑屆候該國王正可藉拂炎薰至此間相隔交南道里甚遙若以時鮮食品附驛遠寄恐致微損不堪食用今隨報發去菓乾一匣以示

眷注該國王接奉後不必專表謝恩止須附便奏及仰副體恤至
意將此諭令知之

東華續錄

乾隆一百十四

臣王先謙敬編

臣周澐著恭校

秋七月甲戌朔命回城阿奇木伯克設立清文學校○甲申諭軍機大臣等富綱奏據騰越鎮州稟報有福建民人蔡元燭方賢二名從緬甸投出詢係五十年十二月內前往暹羅貿易被緬人裹往阿瓦上年國王孟隕感激恩准開關查知伊等尙未回籍各給路費咨送進關等語緬甸國王孟隕前因向化投誠籲請錫封通市朕俯念該國王恭順惻忱錫之寵命並准開關貿易以示懷柔今該國王感戴恩施凡內地人民羈留在彼者俱給與盤費遣送進關其效順輸忱實可嘉尙著賞給蟒段二匹錦二匹大段二匹紗二匹大荷包一對小荷包二對用昭優獎著富綱派員齎至關

外交該國頭目孟幹轉送該國王祇領並繕寫照會移知孟隕以該國王資送內地人民回籍具見小心敬順經本督部堂據情奏達大皇帝垂鑒款誠特加優賚國王益當恪守藩封永承恩眷也○己丑諭軍機大臣等書麟等奏伏汎水勢安瀾工程平穩一摺覽奏欣慰惟摺內稱洪澤湖水因頻得大雨淮水加長匯注洪湖高堰誌椿長至一丈零四寸等語聲敘總不明白又稱清口以下清黃併注甚爲湍激徐城北門誌椿仍存新舊共長水一丈二尺更不成話河湖誌椿長水情形該督等自應將舊存底水若干尺新長若干尺分別聲明乃輒稱洪湖長水一丈有餘徐城黃河長水一丈二尺有餘竟似河湖各水暴漲一丈餘再加底水更不知若何浩瀚書麟等豈能設法抵禦此係向來河工陋習故作此語以爲水勢盛長伊等搶護平穩更見籌畫有方前年六月內書麟

蘭第錫奏報徐城誌椿長水一丈三尺六寸並不將舊存新長分敘經朕降旨訓諭並令嗣後將新長尺寸明白具奏不得仍前陋習該督等豈未接奉乃未久忘之復蹈故轍又爲此牽混之詞甚屬非是况本日據李奉翰等奏黃河僅長水一尺三寸下游徐城誌椿長水尺寸自亦相仿何至陡長一丈二尺餘寸尤爲錯謬且李奉翰所奏亦止將新長之水敘入並不牽連底水甚爲明晰豈書麟蘭第錫兩人轉不如李奉翰之曉事耶蘭第錫人本蠢直或一時大意而書麟係棄瑕錄用之人又復久任河工自應加倍細心勉力以冀稍贖前愆何漫不經心若此朕將伊復加擢用兩江總督時原慮其才短無用今卽此奏報長水尺寸一端更可槩見書麟蘭第錫俱著嚴行申飭並將李奉翰等原摺鈔寄閱看至此次水勢不至十分漲盛各工保護平穩亦惟仰賴神佑若似書麟

等如此糊塗其籌畫調度實不可恃見在伏汛雖過秋汛正長該督等益當嚴督在工人員慎之又慎敬謹巡防以期工程鞏固毋得稍有懈弛致干咎戾所有湖河誌椿究竟新長水若干舊存底水若干著書麟等卽行分晰奏覆勿再牽混將此傳諭書麟蘭第錫並諭李奉翰知之尋奏徐城北門誌椿舊存底水一丈一尺四寸新長水一尺一寸見存水共一丈二尺五寸洪澤湖高堰誌椿舊存底水四尺四寸新長水六尺見存水共一丈四寸得旨其如識見不到而更不用心何○癸巳諭昨據宗人府奏貝勒縣從病故一摺自果恭親王福晉至縣從之妻三代孀居縣從又無子嗣今縣從之爵輪應永琛承襲但永琛一支竟至絕嗣永琛見在既有二子卽將一子爲永琛後承襲縣從之爵則永琛不至絕嗣而三代孀婦均有依倚著派八阿哥阿桂卽往縣從家面問伊祖母

福晉可否如此辦理奏聞再降諭旨○丁酉諭刑部題覆浙江省民人張雲濫與邱方玉之母湯氏妻曹氏通姦商同勒死邱方玉並曹氏畏罪自縊身死一案將湯氏照親母因姦謀死子女例實發伊犁給兵丁爲奴固屬照例辦理但細閱此案情節湯氏先與張雲濫調戲通姦被伊媳曹氏窺破恐其洩漏誘令張雲濫一併通姦後因曹氏戀姦情密商同張雲濫將邱方玉勒斃除謀殺親夫罪應凌遲之曹氏業經畏罪自縊外其親母湯氏雖係尊長致死卑幼然事起通姦並誘令伊媳一併姦宿復因伊子礙眼輒聽從伊媳同謀勒斃是與伊子邱方玉恩義已絕設或伊子別無兄弟子嗣遂令翁姑及伊夫絕嗣所關甚爲重大向例母親因姦謀死子女者不論是否造意俱發往伊犁給兵丁爲奴原以母子倫紀攸關不得與凡人一律問抵若其母身蹈邪淫罔顧廉恥已無

夫婦之倫又安有母子之義朕思同一母子然又有親母繼母之別繼母因其子本非己出心懷殘忍謀死前妻之子情罪自爲更重若親母之於子究係所生卽或因姦致死與繼母自當有閒亦應分別辦理近來各省題奏事件內閒有逞兇斃命瞽不畏法之案出於情理之外然戾氣所鍾自古而有卽如文言釋坤初六曰之言可知周之時已有如此亂逆之事設無其事孔子不忍言也今世風日降人心更不如古無怪兇惡之徒竟至藐法蔑倫行同梟獍朕向來遇有此等奏到之件因係蔑倫重案槩不加以硃批不惟不忍而且自慚民間風俗日下旣不能道德齊禮化莠爲良俾不至身罹法網我君臣皆當引以爲愧惟在明刑救法重示創懲庶兇惡之徒稍知儆戒使之勉爲善良朕意各省如有母殺子女之案除尋常情節仍照向例辦理外其有因姦起意致令絕嗣

者卽將其母問擬斬候入於秋審情實卽或伊子尙有子弟未至
絕嗣仍當定以斬候永遠監禁遇赦不赦其繼母親母於情實中
略予以句不句之分亦足以示輕重區別著大學士九卿將是否
應如此辦理及如何分別之處悉心酌議具奏其邱湯氏一案俟
大學士等詳議覆奏再行降旨尋議嗣後繼母因姦將前妻子女
致死滅口者無論是否起意俱定爲擬斬監候仍查明伊夫如已
絕嗣卽入於秋審情實若尙有子嗣將該犯婦永遠監禁遇赦不
赦至親母因姦故殺子女之案亦不論是否起意俱請擬絞監候
致令伊夫絕嗣者入於秋審情實卽不至絕嗣仍永遠監禁不准
援赦若姦夫獨自起意謀殺其子以便往來姦婦雖未知情同謀
但因姦令夫絕嗣者係繼母發往伊犁給兵丁爲奴親母發往各
省給駐防兵丁爲奴如姦婦果不知情當時喊救事後告官或伊

夫尙有子嗣及姦夫別因他故起釁自殺其子者姦夫仍按所犯本罪悉照本條律例辦理其嫡母有犯與親母同嗣母有犯與繼母同見在邱湯氏一犯查明伊子所生尙有一子卽遵照新定條例改擬具題從之○諭八阿哥阿桂遵旨往見縣從之祖母據稱請以永琛之子縣律給與永琛爲嗣等語代爲轉奏著照縣從之祖母所請將永琛之長子縣律與永琛爲嗣所有承襲之爵理應減等承襲貝子但果恭親王弘瞻係朕幼弟伊溘逝後卽將郡王之爵秩襲與永琛及至縣從延世未久相繼而亡朕心甚爲惻然著加恩縣律仍承襲貝勒之爵侍養三代孀婦以示朕憫卹之至意○辛丑諭軍機大臣等費瀋奏請給價收買商銅以杜私鑄一摺內稱滇省辦銅各廠除抽課交官外尙有一成二成准令通商之例商人難保無影射收買私鑄漁利情弊應官爲收買每年可

多獲銅一百餘萬斤以之添撥各省採買及鐵砂折耗鑪店底銅之用等語此奏雖似爲該省杜絕私鑄起見其實該藩司以各省採買銅斤及鑪店底銅恐有欠缺故欲將此項商買餘銅歸官以作抵補之用止係一偏之見未經通盤籌畫所謂知其一不知其二也銅斤爲民間必需之物不能一日缺少即使廠中稍有偷漏爲數亦屬無多若將各廠抽課各官所贍餘銅槩行禁止商民售賣則民間所用之銅從何而出不特銅價因此昂貴而小民等需用孔亟必致將官錢私行銷毀改鑄銅器卽錢價亦必因之倍增况見在滇省各廠所產銅斤尙屬旺盛每年額運各起俱係依限開幫並無短絀遲誤卽民間錢價亦俱平減本無庸鯁鯁過慮若如該藩司所奏是名爲設法調劑而轉使私銷益甚弊竇叢生况杜絕私鑄之弊惟在地方官實力查禁今不於此悉心整頓而以

禁止商買餘銅爲正本清源之計恐防弊而實以滋弊且使該處商民知有此事必將銅斤豫爲擡價居奇銅價既貴則錢價自增於閭閻日用諸多不便所關非細民可使由不可使知費渫何見不及此耶此事當再加詳酌富綱譚尙忠久任滇省於銅務自所熟習著伊二人會同悉心妥議據實奏覆想該督撫意見亦與朕大略相同也將此傳諭富綱譚尙忠知之並將此旨及原摺發交在京大學士九卿閱看

八月甲寅

上御山莊宮門觀射

皇孫質郡王縣慶年十三中

三矢賜黃褂三眼花翎

皇元孫載錫年八歲中三矢賜黃褂雙

眼花翎

御製誌喜詩○戊午

上自避暑山莊巡幸木蘭行圍

○甲子

上行圍

皇孫

宣宗皇帝年十歲中鹿賜黃褂雙眼

花翎

御製成遜格爾行圍誌事詩曰

堯年避暑奉

慈甯樺

室安居聽敬聽老我策驍尙武服幼孫中鹿賜花翎是宜誌事成
七律所喜爭先早二齡 家法永遵縣奕葉承 天恩貺慎儀刑

○駐藏辦事大臣保泰雅滿泰奏據喇嘛噶布倫稟稱六月初二十
四日行至聶拉木給信與廓爾喀商議舊時未完債項七月初六
日廓爾喀頭人帶領七十餘人至聶拉木次早廓爾喀頭人等領
兵千餘向聶拉木進發我等見來人甚眾一時不能禁止將彼處
橋梁拆毀廓爾喀疑斷其歸路混放鳥槍致相爭鬭廓爾喀即占
據聶拉木將噶布倫戴綳等俱圍在彼處臣等隨遣都司嚴廷良
迅赴聶拉木查問起釁緣由並委戴綳敏珠爾多爾濟帶領唐古
特兵丁飛往救應臣保泰調達木兵五百名酌帶綠營兵丁至扎
什倫布安撫人眾諭軍機大臣等據保泰等奏廓爾喀將噶布倫
戴綳誘去圍在聶拉木膽敢占據地方保泰見往後藏酌辦並稱

成德亦願前往廓爾喀係歸降外夷何遽敢肆行滋擾從前鄂輝
成德巴忠辦理藏務時若將債欠查明清還自可久遠甯謐乃含
糊辦交噶布倫私自還給唐古特性本瑣屑復不照原議給發致
有此事若差去之噶布倫能知事體輕重與廓爾喀理論限期還
給則廓爾喀亦不敢占據滋事止因丹津班珠爾見廓爾喀人眾
心存懦怯退回拆橋廓爾喀見橋已拆毀懷疑生變其情形可想
而知保素聞信卽赴後藏如已查明辦竣固屬甚好儻若暫且不
能完事鄂輝距彼甚近自可不時聞信成德人稍蠱率未經歷練
應令鄂輝前往爲妥亦不必多帶兵丁不過於伊所管綠營內揀
選五十人帶去已足敷用鄂輝係總督大員前往廓爾喀自必聞
風膽落西藏見有達木蒙古兵丁若再有需用之處內地相去萬
遠可於土練番兵內就近調取千餘名不獨順便且較爲得力著

鄂輝探聽西藏信息相機妥辦再保泰奏廓爾喀僭肆掠進攻卽將班禪額爾德尼移於前藏所奏亦屬太過班禪額爾德尼在扎什倫布眾心安帖儻一動移後藏人眾必致紛紛擾亂不成事體況廓爾喀旣能侵後藏亦必能侵前藏彼時又將移達賴喇嘛班禪額爾德尼於何地保泰止可靜守斷不可輕移妄動致惑眾心如實有變萬不得已不得不移則又不必拘泥此旨再廓爾喀前經悔罪歸順封錫王公膺受恩典唐古特縱有欠項負約亦當訴知駐藏大臣懇求判斷自能代伊查辦並將失信之噶布倫加以責處乃並不呈明駐藏大臣竟擅自圍住聶拉木大肆猖狂著鄂輝保泰多寫示帖嚴行曉諭以前歲爾等與藏內失和任意侵掠天朝曾發兵進討因爾等悔懼歸誠貸其旣往封爵優隆今爾等不知感恩又復滋擾大兵卽時雲集爾等自問能抗拒乎縱再傾

心降順泥首額求亦恐難邀寬免矣如此詞嚴義正明切曉示並
將帶去兵丁揚威奮武使之聞而懾服保泰馳抵後藏卽將廓爾
喀情形如何之處速由六百里具奏候朕再降諭旨又諭廓爾喀
人等膽敢圍困丹津班珠爾等侵犯聶拉木一事一則因當日鄂
輝成德巴忠辦理不妥苟且了事以致今日復生事端彼時據鄂
輝等奏但稱一切事務俱已妥爲安置欠項俱已還清原爾喀遣
使進京瞻覲其欠項如何擬定歸還以及兩造立結之處並未具
奏顯係鄂輝成德巴忠等急欲了事苟且完結此卽鄂輝等之罪
二則保泰等抵藏理合查明一面將鄂輝等參奏一面妥辦具奏
何得佯若罔聞比及有事始奏稱詢問達賴喇嘛方知此事乃保
泰等之大誤況達賴喇嘛之所以遣丹津班珠爾特爲債目所謂
查邊操兵皆屬假託彼時保泰何得並不窮詰使丹津班珠爾等

曉事亦當在附近地方留心察看至廓爾喀人等所云還完一限再還一限其餘卽不追索之言亦不過詭哄丹津班珠爾等前往其意以爲一經圍困之後卽可爲質索項乃丹津班珠爾等並不審察輕重但圖目前之利徑行往見入其術中而又懦弱過甚拆毀橋梁致廓爾喀人等疑爲斷其歸路皆由保泰等未經詳察一任達賴喇嘛遣丹津班珠爾前往之所致也保泰等如能辦結此事甚妥萬一不能鄂輝到彼惟宜會同保泰等留心熟籌務期作速辦結鄂輝保泰雅滿泰均受朕重恩稍爲曉事務期於事有益示外夷以大方體統廓爾喀均係內附天朝之臣僕鄂輝保泰雅滿泰宜遣妥幹人員見伊等宣諭云此次爾等圍困達賴喇嘛所差之人侵犯聶拉木不過爲索取債目今我等已代爾等向唐古特等追出意欲歸還汝等但汝等係歸順之臣僕遇有事故理宜

聲明情節稟報大臣等求其判斷既可如數得銀而此後兩造貿易之事我大臣等亦好代汝等辦理彼此斷不至於拖欠爾等亦得永沐大皇帝恩施乃計不出此擅敢圍困丹津班珠爾侵犯聶拉木今我等將欠項追出還給汝等汝等當恭順祇領唯命是從儻執迷不返我等即奏聞大皇帝立即發兵剿滅汝等宜審度利害如此遣人往諭儻唐古特等之力不能清還即動官項代還再勒限向噶布倫等追出歸款但此意斷不可使廓爾喀人等得知要之兵固不可輕動然遇必須用兵之事亦不可吝惜錢糧因小以失大卽如康熙年間爲西藏之事兩次發兵前往鄂輝等惟宜相機辦理不得固執亦不可張皇失措鄂輝保泰此次若能辦妥勉贖前愆朕仍嘉予但丹津班珠爾係班第達之子班第達係西藏名門世胃藏內之人未免有畏懼遠巡之意班第達係最要之

人其子爲廓爾喀所困暫不能出難保其不胡思妄作鄂輝保泰雅滿泰等宜潛行留心不露形迹至唐古特所欠廓爾喀債目究係拖欠幾限未還之處鄂輝到彼查明順便奏聞○命孫士毅署四川總督鄂輝領兵進剿廓爾喀○丁卯諭軍機大臣等前歲廓爾喀滋事朕特著鄂輝成德巴忠前往辦理乃鄂輝不思久遠奠安惟圖苟且了事致廓爾喀復肆跳梁朕以此事係鄂輝承辦已降旨仍著鄂輝前往今據鄂輝成德所奏仍遣成德督辦鄂輝受朕深恩簡用總督廓爾喀之事又係鄂輝初時辦理不善以致滋事何尙觀望不前著嚴行申飭至此事朕前交鄂輝成德巴忠會同辦理此次保泰奏到朕披覽之後將摺令巴忠閱看尙未加以責斥次日巴忠在軍機大臣前自稱此事辦理不善懇祈趕赴藏地效力贖罪經軍機大臣等代奏朕因已遣鄂輝往辦未令前往

不意巴忠卽於是夜潛出投河淹斃殊堪駭異因思從前商辦此事時巴忠必自倚侍御前侍衛隨從有年又爲欽差大員凡有事件俱係自專今復滋生事端恐鄂輝成德據實陳奏心懷疑畏是以短見自戕伊旣如此鄂輝等聞知未必不至狐疑慌亂儻因此貽誤公事伊等不能當其咎也著傳諭鄂輝等令其安心奮勉馳赴藏地如將此事妥辦完竣朕必加恩寬宥以功抵罪儻仍苟且了事不爲久遠之計鄂輝更何顏見朕耶至保泰見已自前藏往扎什倫布所有事務卽著保泰相機辦理不必等候鄂輝廓爾喀雖係絕域但其人不無詭計保泰於臨近時務須留心防範不可輕視萬一爲其所欺於國體大有關係保泰惟當慎之又慎○戊辰諭軍機大臣等據陳用敷奏阮光平奉到端陽節恩賞並諭旨一道硃批金簡原摺一併具表謝恩將表文進呈朕閱該國王表

內情詞懇切感戴惻忱出於至誠流露甚爲喜悅又據該國王表
內稱前經奉旨查尋黎維祁弟妹眷屬起送北上而伊等內懷疑
阻尙無消息今奉廷寄遵旨諭知黎維祁妄聽教唆不安本分其
眷屬毋庸查訪等語從前黎維祁到京後賞給俸祿錢糧建蓋房
屋伊尙知感激朕恩情願在京居住是以降旨令阮光平爲之查
訪弟妹眷屬送京使其一家團聚乃黎維祁聽信黃益曉等唆使
滋事經金簡等詳加曉諭伊仍屢次瀆稟訓飭不悛是以諭知阮
光平毋庸將伊眷屬尋訪此皆黎維祁愚情無知福分淺薄不能
承受朕恩其咎實由自取著將阮光平表文並硃批金簡原摺一
併發交金簡令傳黎維祁閱看並著傳旨曉諭黎維祁如伊自知
改悔循分安居尙可承受恩眷仰荷生成儻再復萌妄念不知安
靜守法必當重治其罪不能再邀矜宥也

九月乙亥調諾穆親爲理藩院侍郎吉慶爲戶部左侍郎

由兵左調

○

丙子 上駐蹕避暑山莊○丁丑諭軍機大臣等廓爾喀人等肆行滋擾侵占地方將噶布倫等圍困執去但唐古特人等賦性懦弱見敵則走遣發大兵又不能遇賊痛剿而我兵一撤廓爾喀又復乘閒前來今據軍機大臣等奏稱廓爾喀與西藏接壤從前伍彌泰薩喇善駐彼辦事之時卽有因私事起釁搶掠地方及圍困使人之事旋復和好仍舊通商無關緊要駐藏大臣但付之不問卽前年廓爾喀搶掠唐古特宗喀濟隴地方之事慶麟張皇失措不計事之輕重冒昧具奏以致大費氣力始得完事若照前令其私下完結何至如彼等語極邊小夷彼此劫掠乃其常情軍機大臣等皆知其土俗乃保泰等在彼反不知乎國家帑項豐盈士卒眾多發兵前往爲一勞永逸之計誠無所惜但廓爾喀因利相爭

遣兵前往伊等不敢抗拒望影奔潰勢必稽顙請降若允其請而班師唐古特人等又不能守約善鄰每因小利而激變又復呈請代爲辦理似此牽纏殊屬不成事體此次之事卽其明證觀保泰等此次所奏顯係憶及前歲慶麟曾經具奏始效尤而爲之保泰鄂輝在藏亦屬多年該處實在情形自必稔知著傳諭鄂輝保泰此事究竟應否作何辦理俾其私下完結之處盡心熟籌各抒己見據實奏聞○諭青海等處番子歸西甯辦事大臣管理○庚辰諭本日召見新調貴州按察使顧長紱詢其祖母年已七十九歲伊母年近七旬貴州道路較遠難以就養顧長紱著調補浙江按察使其貴州按察使員缺卽著姜開陽補授○壬午諭朕偶閱嘉靖年間所刻文獻通考其序文內有命司禮監重刻以傳之語文獻通考一書於列代制度典章采摭綜覈鏤板以傳原屬表章之

道但自應交與儒臣詳校精覈付諸梨棗庶於稽古崇文較有裨益乃竟付諸奄豎之手率行承辦書內句讀及所別四聲多有舛誤卽此可見嘉靖年間惟知溺志焚修耽心齋醮於政治朝綱廢弛不講此書自不值特加論說重爲駁正著將此旨錄存首冊以示朕崇實黜浮至意○丙戌 上自避暑山莊回鑾○己丑以玉

保爲盛京兵部侍郎

由內閣學士遷

○辛卯諭駐藏大臣凡遇噶布倫缺

出會同達賴喇嘛秉公選定出力人員奏請揀放著爲令○壬辰諭西藏見有廓爾喀等肆行疆梁搶占地方擄去噶布倫等之事保泰雅滿泰殊屬昏憤所辦均無章程除將保泰雅滿泰革職仍留該處效力贖罪外保泰所遺正紅旗蒙古都統員缺著奎林補授前往西藏駐紮辦事奎林接奉此旨急速馳驛前往西藏無庸來京請訓奎林所管都統事務仍著永琨署理舒濂從前曾在西

藏坐辦事務嗣經調回軍機處行走於廓爾喀等滋事之由及如何降旨指示辦理之處舒濂尙屬知曉著施恩賞給副都統職銜馳驛前往協同奎林辦理事務○諭軍機大臣等保泰等所奏以唐古特兵少賊勢甚迫欲將達賴喇嘛班禪額爾德尼移於泰甯是何言也保泰雅滿泰二人不料其喪心病狂一至於此竟是無用之物瞽亂已甚幸而達賴喇嘛堅意不從儻誤聽保泰等之言竟棄布達拉而去尙復成何事體朕深喜達賴喇嘛如此通曉事理而所屬堪布及各大喇嘛亦共知大義堅心保守其僧俗人等俱不至驚散朕心稍爲寬慰實堪嘉獎今特發大哈達一方正珠記念一串交成德等給與達賴喇嘛示朕獎悅之意至保泰雅滿泰二人遇廓爾喀滋擾之事卽心慌膽落懦怯已極殊屬負恩目下正當有事之時暫將保泰雅滿泰革職留彼效力贖罪此旨到

時成德鄂輝想已先後抵藏所有欲保守布達拉之堪布大喇嘛
卽著查明具奏候朕施恩賞給名號再向者朕以達賴喇嘛不能
約束其弟在彼隨同居住貪利作弊於藏務無益是以令其來京
今觀達賴喇嘛能毅然決斷甚有識見著加恩令伊弟羅布藏根
敦扎克巴回至西藏仍隨達賴喇嘛居住以資奉侍俟今歲年班
堪布等來京時附便同回成德等先將此旨告知達賴喇嘛但其
弟至藏時仍不可令其管事除就近曉諭舒濂外並諭令鄂輝知
之○甲午諭軍機大臣等廓爾喀侵占聶拉木濟龍竟敢犯至扎
什倫布若不痛加懲創斷不能使之懾服前此所言償債之事竟
無庸提及著鄂輝成德卽向廓爾喀諭以爾等受大皇帝隆恩封
爲王公乃敢如此妄爲甚屬可惡爾等搶奪唐古特地方較所欠
之債已越數倍爾等將所有搶奪物件卽行呈交方可飭令在藏

番民遺汝欠債若不呈出豈但不償汝債並且與師問罪痛加殲
戮將此明白曉諭後卽整齊軍旅痛加懲勦但計鄂輝成德到彼
需時奎林爲日更久見值冰雪之時賊匪定已回巢一俟來年雪
化後務須宣示兵威深入剿殺使之畏懼帖服方爲一勞永逸之
計見今所謂兵數略少奎林鄂輝成德等公同商酌或遣兵或降
番再調一二千名俟其到齊進剿奎林成德各領一隊分爲兩路
前進鄂輝自領一隊由聶拉木接應後路不可稍存輕忽亦不可
草率完事務使彼恭順乞哀真心懾服不敢再行滋事方爲妥善
此次雖係令鄂輝成德帶兵前往奎林舒濂駐藏辦事但一切事
務總宜和衷共濟切不可分別軍務地方稍存畛域之見至成德
奏接准保泰來咨不敢拘泥前旨卽兼程先赴前藏撫安眾心甚
屬可嘉但伊領兵甚少不可一到卽輕易進兵務宜持重俟頭隊

官兵到後再行奮勇打仗成德此時務須急馳到藏將賊匪情形
速行奏聞○乙未轉明興爲兵部左侍郎以和琳爲兵部右侍郎
由內閣○戊戌 上還京師○庚子諭軍機大臣等前次廓爾喀
學士還○戊戌 上還京師○庚子諭軍機大臣等前次廓爾喀
侵擾西藏邊境時鄂輝等將就了事並未大示創懲賊匪無所畏
懼又習見唐古特怯懦敢肆欺陵是以此次復來滋擾若不示以
軍威則我軍甫撤賊匪復來方欲進兵賊已遠遁頻歲勞師遠涉
仍屬無功終非一勞永逸之計朕意至明歲春融厚集兵力分路
進討鄂輝資望較輕恐難勝統兵重任且鄂輝前在金川軍營尙
係守備奎林已爲領隊大臣卽成德彼時職分亦在鄂輝之上今
令奎林成德分路帶兵鄂輝在後路接應則奎林成德轉似偏裨
恐不相下朕再四思維竟須福康安前往督辦方足以資統率福
康安素嫻軍旅識見較鄂輝爲優且奎林係福康安堂兄平日尙

稱友愛令其同辦軍務想能和衷協辦迅速藏功至鄂輝平日帶兵不甚奮勇亦不能周到朕意卽令鄂輝留駐藏地辦理糧運無須同在軍營況見在駐藏大臣除奎林帶兵外止有舒濂一人在彼一切採辦糧餉及接運軍糈等事均關緊要得鄂輝舒濂商同辦理更於軍行有益著傳諭福康安接奉此旨卽履程迅速來京候朕面授方略○諭廓爾喀所鑄錢文向衛藏行使原爲貪圖利息起見後又欲將舊錢停止專用新錢每銀一兩止肯用錢六箇固屬貪得無厭而噶布倫番眾人等與彼交易亦不免圖占便宜彼此惟利是圖各不相下以致復滋事端但衛藏地方行使廓爾喀錢文總緣唐古特人等向與廓爾喀交易買賣是以不得不從其便今該賊匪反覆無常肆行搶掠昨已降旨令將在前藏貿易之人槩行逐去卽使廓爾喀震懾兵威懇求納款亦斷不准其再

通貿易是廓爾喀所鑄錢文衛藏竟可無須行用我國家中外一
統同軌同文官鑄制錢通行無滯區區藏地何必轉用外番幣貨
况伊將所鑄之錢易回銀兩又復換銅鑄錢向藏內交易源源換
給是衛藏銀兩轉被廓爾喀逐漸易換尤屬不成事體若於內地
鑄錢運往程站迺遠口外又多夾壩運送維艱莫若於西藏地方
照內地之例安設鑄座撥派官匠卽在彼鼓鑄駐藏大臣督同員
役監製經理自可不虞缺乏將來勦辦事竣鄂輝當傳齊達賴喇
嘛噶布倫等明白宣諭以唐古特人等懦弱無能又復固執貪利
此次因伊等與廓爾喀換易錢文紛爭滋事是以大皇帝爲保護
衛藏派調大兵前來勦辦俾僧俗番眾倚賴安全所有廓爾喀貿
易人等俱不准其復來交易永斷葛藤特於藏內鼓鑄官錢令其
行用伊等舊存廓爾喀錢文槩行銷作銀兩一律使用官錢伊等

當感激大皇帝愛護深恩敬謹遵行即可永資樂利若狃於積習不知感悟仍欲與廓爾喀彼此交易行使所鑄錢文則伊等竟係冥頑不靈自貽伊戚必將駐藏大臣一併撤回任聽伊等所爲即使賊匪再來滋擾亦不復過問矣如此明白諭知該處僧俗番民自當各知醒悟遵照辦理至鄂輝摺內又稱後藏距廓爾喀甚遠糧運烏拉更爲掣肘此時不進兵斷乎不可若用兵大舉於事亦實不值看來鄂輝不免有仍前畏難將就了事之見廓爾喀原屬無能此時鄂輝成德等先後帶兵前抵該處賊匪自必聞風竄避但必須懾以兵威痛加懲創俾知懾服不敢再萌他念方期一勞永逸若少存將就了事之意使彼無所畏憚大兵撤後彼必復至邊境搶掠又將作何辦理儻復須調兵進剿是賊匪轉得以逸待勞反客爲主從來外夷反覆無常見兵威壯盛卽行逃竄及大兵

撤去仍來窺伺往往疲敝內地用兵之道當先發制人若云道路遙遠糧運維艱豈有賊匪能來我兵難往之理鄂輝等惟當相度機宜妥爲籌辦俟兵力厚集痛加勦殺使之聞風膽落不可先存遷就致留後患又諭川省籌辦糧餉及察木多等處存貯米麥藏地採買糧石止豫備見調兵丁支食若明春大舉進勦調兵近萬見備軍糧自屬不敷支用軍行以糧運爲先若臨時稍有缺乏則師不宿飽安能使之枵腹進征此時先事豫籌源源接濟實爲軍興要務但近年辦理軍需多有糜費從前康熙五十七八九年雍正六年俱會出師西藏調派滇省兵丁卽係由維西一路出巴塘赴藏所有糧運事宜均有辦定章程川省滇省舊案自尙齊全孫士毅富綱譚尙忠均係戶部司員出身孫士毅費滄又曾在軍機章京行走從前辦理西藏舊案想會目覩著卽令孫士毅等詳

查康熙雍正年間章程倣照辦理不可照近年軍需之例稍有浮冒西藏距川省萬有餘里道途遙遠且口外均係番子地方全賴烏拉運送不能迅速將來軍營需用糧石遠赴川省調取實屬緩不濟急朕思察木多居適中之地或將察木多等處見存糧石運送西藏再將川省附近邊界備辦軍糧撥補察木多存貯續行運送如此源源運庶可無虞缺乏且打箭爐以外土司地方均係種植稞麥並著孫士毅酌量情形就近採買運送道路較近既可以豫備急需又可以節省運費於軍務大有裨益至鄂輝所奏藏地糧運維艱道途險遠未免有畏難之意殊不知賊匪遠來藏地口食未聞缺乏將來我兵深入賊境自當資糧於賊鄂輝等到彼務須會同成德設法籌辦以利軍行總之糧餉爲兵行要務孫士毅等務須查照舊案悉心妥辦不可稍有貽誤

冬十月甲辰諭據廣東督撫福康安郭世勳奏安南國王阮光平
派撥都督黎文認等帶兵駕船在觀瀾海面追獲盜船擊斃落水
二十餘人生擒二犯業經就地處決仍將前次肅去賞物優加賞
賚以示鼓勵等語廣東洋盜因內地官兵追拏緊急竄入安南洋
面前經福康安咨會安南一體協拏該國王卽派撥兵丁在外洋
認真堵緝上年據該國屯將范光章捕獲盜犯曾經優加賞賚茲
復據阮光平派撥都督黎文認帶兵追獲盜船擊斃多人生擒匪
犯二名卽行正法不使稍稽顯戮具見該國王感激朕恩力圖報
效實堪嘉獎著加恩賞給阮光平金花段二匹八絲段二匹紅呢
一板果乾一匣奶餅一匣以昭優眷黎文認奉委緝盜認真巡哨
甚屬奮勇出力亦著加恩賞給五絲段二匹用示獎勵至該國王
前遞到謝恩表文其感戴惻忱實屬至誠流露已於表文內用硃

筆批答著一併發交阮光平閱看該國王偃受朕恩仰懇褒獎益當倍加感奮不必差員及特表謝恩也將此諭令知之○乙巳諭閔鶚元前任江蘇巡撫任內於高郵州句容縣書役僞串假票侵那錢糧兩案遷延不奏始則有意消弭繼復飾詞掩蓋種種廢弛貽誤其罪甚重經大學士九卿按律問擬改爲監候本屬罪所應得但念閔鶚元於高郵句容二案辦理錯謬之處節經降旨查訊實係徇庇屬員心存迴護任內尙無別項貪黷亂法情節此等庇護徇私之事各省督撫中卽不能保其必無特未經敗露得以倖免耳閔鶚元羈禁囹圄已經歲餘且年逾七旬著加恩卽行釋放伊精力已衰並非不可少之人亦不足再加錄用著卽令其回籍閉門思過閔鶚元益當感激朕法外施恩自知愧悔○丁未原任西藏辦事大臣保泰奏廓爾喀賊眾搶占扎什倫布旋於九月初

一日圍援營官寨官兵施放槍礮殺死賊首一名賊眾數十名將寨固守夜間賊匪將附近唐古特積穀焚毀諭軍機大臣等廓爾喀賊匪侵擾後藏志在搶掠斷不能在彼久住朕早已料其必思竄回今賊匪將唐古特糧食焚毀可見賊匪自知勢難久留急思遁去是以將積聚槩行焚毀若賊匪尙欲在藏滋擾則此項糧石正可掠食豈有轉行燒毀之理看來賊匪無能斷不敢擾及前藏况前藏距扎什倫布不過數日路程賊匪於八月二十一日占據扎什倫布距保泰發摺之時已及兩旬儻賊匪果有覬覦前藏之意豈肯遲之多日尙在後藏株守耶此時鄂輝成德帶兵到彼賊匪自己早已早竄但必須懾以兵威痛加剿戮方可使之畏懼不敢再萌窺伺今鄂輝成德先後奏到各摺俱不免存將就完事之見殊不知朕之初意原不欲勞師遠涉今賊匪肆行侵擾竟敢搶占扎

什倫布不得不聲罪致討非彼乞哀可完之事若因賊匪已遁遂
思就事完結使賊匪無所畏懼將來大兵撤歸賊匪復來滋擾又
將作何辦理豈有堂堂天朝轉爲徼外番賊牽制之理此事勢在
必辦孫士毅鄂輝成德惟當堅持定見將調派兵丁籌辦糧餉各
事宜通盤籌畫俟明春大舉時軍食充裕兵力壯盛一俟雪化卽
可窮追深入痛加剿殺以爲一勞永逸之計至都司徐南鵬帶兵
固守營官寨尙屬奮勉俟應升缺出卽行升用以示鼓勵○諭保
奏奏據綏綏堪布羅卜藏凱木楚克稟稱仲巴呼圖克圖於賊匪
未到之先將細軟物件搬至東喀爾藏匿其扎什倫布廟內有孜
仲喇嘛及四學堪布喇嘛在吉祥天母前占卜妄稱占得不可與
賊接仗以致眾心惑亂不復守禦皆行散去致被賊匪占據等語
實爲可笑可恨孜仲堪布喇嘛等皈依佛教見賊匪侵擾佛地自

應督率眾喇嘛等極力保護乃竟假託占辭妄行搖惑以致喇嘛
番眾皆無固志相率散去似此喪心叛教之徒若班禪額爾德尼
尙在扎什倫布亦必委之於賊甚或縛獻降賊皆不可知其情罪
實屬重大著傳諭鄂輝等到彼後卽查明占卜惑眾之孜仲喇嘛
及四學堪布喇嘛等係屬何人卽行正法至仲巴呼圖克圖帶領
眾喇嘛看守扎什倫布一聞賊匪信息卽先期逃避委之不顧本
應一併正法但念係班禪額爾德尼之兄姑從寬典卽著雅滿泰
拏解來京其尙卓特巴之缺著綏綏堪布補授至賊匪雖已將扎
什倫布搶占但其勢不能久住必已竄回該處廟宇係歷輩班禪
額爾德尼駐錫之地經賊蹂躪僧眾離析必應亟爲整頓加意安
輯見在班禪額爾德尼隨從之人自必尙多鄂輝成德抵藏時卽
派新放尙卓特巴之綏綏堪布速往扎什倫布安爲安撫清查貴

財以便將來平定後班禪額爾德尼安禪棲止僧眾等亦各復業不致失所方爲妥善○戊申以吳省蘭爲內閣學士

由僧事遷

○壬子

諭據保泰等奏稱廓爾喀賊匪來至後藏入扎什倫布廟中肆行擄掠將塔上鑲嵌綠松石珊瑚等摘去卽皆遁回又稱唐古特等聞廓爾喀來侵聲息前藏人眾盡皆驚擾妄行逃避雖稱尊奉達賴喇嘛而實無愛護之心達賴喇嘛班禪額爾德尼不可在藏居住請移於泰甯或西甯居住等語所奏竟是狂謬廓爾喀賊匪侵擾之事奏到之初朕卽謂此等賊匪不難辦理不過稍事搶擄一聞內地大兵將至卽當遁歸今果逃遁歸去矣夫自賊匪擾動保泰卽怯懦驚懼全無措置主見今賊匪旣已遁歸又不追趕剿殺欲將達賴喇嘛班禪額爾德尼移於泰甯西甯是誠何心賊眾入扎什倫布廟中止將塔上鑲嵌綠松石等物乞去隨卽遁歸可見

賊匪不過如鼠竊者流初無伎倆既已逃遁正宜尾襲隨後攻殺保泰何並不追趕乃竟畏葸至欲將達賴喇嘛班禪額爾德尼向內遷移耶保泰係納穆扎爾之子朕念伊曾經駐藏平日尙屬曉事遣伊往藏辦理一切事宜自必較他人有主見是以令伊前往不意頓值此事竟至昏亂驚張出人意表可笑亦可恨也卽如雅滿泰尙知上緊追賊此猶略有人心保泰如此怯懦實屬不堪今賊已退回而欲將達賴喇嘛班禪額爾德尼內移是竟將藏地棄捨乎設使賊人得據藏地更思進取遂將察木多裏塘巴塘漸次退讓並將成都亦讓與賊人有是理乎藏地乃 皇祖 皇考再三動用兵力略定之地不惟不可因此小醜騷擾遽行棄置且藏地棄而不取令達賴喇嘛班禪額爾德尼及其徒眾安插何地甚不成事此斷非雅滿泰之意雅滿泰前曾辦理此事若果有其意

亦必具奏矣此必保泰之意朕自御極以來累年辦理大事從無畏難眾所稔知者今八旬有一臨御五十六年豈有處此區區小醜之事反至爲開門揖盜之舉乎保泰卽不自思視朕爲何如主也保泰之意不過以爲將達賴喇嘛班禪額爾德尼移於泰甯或西甯居住後伊便可脫然歸家坐享安逸不意納穆扎爾而竟生此子保甯而有此弟也將此令保甯閱看想伊亦必痛恨其弟也仍著交鄂輝到藏時傳旨將保泰川重柳永遠枷號在該處示儆查明保泰之子有居官者著革職以示儆戒達賴喇嘛班禪額爾德尼居住前後藏扶持黃教振興佛法歷年甚久凡蒙古番子等無不瞻仰藏地朕如此辦理者原爲維持黃教起見著將此旨傳示在京之呼圖克圖喇嘛等俾知朕矜憫達賴喇嘛班禪額爾德尼及全境唐古特人眾維持黃教之意再以蒙古文譯出徧諭中

外各蒙古人等知之○癸丑諭據勒保等奏潼關城垣工程修理完竣請派大臣驗收當經派和琳馳驛前往詳查履勘據和琳奏稱該處工程從前經巴延三德成會同勘估時將不應添修之水關泊岸等工率行浮估並城上添建堆撥房七十二座尤屬虛糜帑項以致用銀一百三十萬兩之多見擬大加刪減等語因令軍機大臣傳到巴延三德成面加詢問伊等俱自認糊塗錯誤咎無可辭是其任意浮估已屬顯然見在和琳會同奏承恩在該處覈實查辦巴延三德成俱係革去頂帶之員卽著革任自備資斧速行前往潼關工所限同和琳等當面講求以服其心所有戶部尙書員缺著福長安調補其工部滿尙書員缺著金簡轉補所遺工部漢尙書員缺著加恩以彭元瑞補授伊係甫經獲罪之人念其學問尙優自降用以來辦理石渠寶笈尙知奮勉是以加恩錄用

彭元瑞益當感激朕恩倍加謹慎勉圖後效無負朕有過施恩至

意○乙卯以劉權之爲禮部侍郎

由左副都御史遷

松筠爲工部侍郎

原任

庫倫辦事大臣

○丙辰吏部議准兩廣總督公福康安奏廣西太平府龍

州緊接安南地界見在開關通市稽查商民所關尤重通判職分較小難資彈壓查潯州府同知附郡事簡應請改爲通判龍州通判改爲同知從之○丁巳俄羅斯懇請開市允之○戊午諭軍機大臣等前經降旨令鄂輝等將巴勒布在前藏貿易之人全行驅逐此項人等自康熙年間即在前藏居住皆有眷屬人戶眾多不下數千名口自必安土重遷不願移回而藏內番民與之婚姻已久若一時押令出境辦理稍有不善或致別生事端更非朕安集後藏僧俗之意此時賊匪業已竄回須俟明春雪化時大兵始行進剿所有驅逐巴勒布一節亦非見在刻不可緩之事總俟福康

安到彼後再行體察情形妥協酌辦鄂輝等不可因接奉前旨稍存拘泥也○庚申諭廓爾喀賊匪侵擾後藏一事朕於保泰初奏到時卽料及賊匪無能不過志在搶掠亟思竄回節經降旨指示保泰等在彼若能稍知調度督率堵禦賊匪自不敢擾及後藏乃保泰怯懦性成一籌莫展惟知張皇其事紛紛遠調滇省及各處官兵赴藏援救甚至知會青海地方令其防備竟不思及各處地方距藏遼遠官兵抵藏賊已早竄徒使多兵坐食糜費軍糧况前後藏地窄人稠蓋藏亦少見經賊眾搶掠若驟添各處調派之兵必致不敷支食將來大兵進剿之時轉致糧餉缺乏採辦維艱經朕屢次將所調官兵停其進發屆期再行調往儻如保泰所奏勞師糜餉擾累番人更復成何事體本日據保泰奏賊匪逃遁後戴綱等進至僧格仔地方賊匪因攜帶物件累重自行燒毀仍由撤

迎一路逃回等語賊匪無能已可鑒見從前賊匪侵犯時保泰親
往後藏果能督率堵截無難痛殲賊眾亦何至扎什倫布等處爲
其蹂躪無如保泰一味畏葸甫聞賊至信息卽帶同班禪額爾德
尼退至前藏以致扎什倫布喇嘛等無所倚仗各思奔避而孜仲
堪布等復於吉祥天母像前占卜妄託神言惑眾人心渙散使賊
匪乘虛占據肆行搶掠是扎什倫布並非賊匪所能攻陷竟係保
泰委之於賊又何異開門揖盜乎保泰旣將後藏失去避至前藏
時又欲將達賴喇嘛班禪額爾德尼移住泰甯猶幸達賴喇嘛及
各寺堪布大喇嘛等深知大義堅詞以拒未經內徙及賊匪逃竄
後保泰仍欲仗官軍之威劫達賴喇嘛班禪額爾德尼移至泰甯
或西甯等處竟棄藏地與賊真成笑話不意悖謬至此試思衛藏
爲崇奉黃教之地各蒙古番眾素所皈依今一旦將達賴喇嘛班

禪額爾德尼移至秦甯西甯地方不特眾蒙古番眾無從瞻仰卽該處僧俗人等亦皆爲賊所擄賊匪原因後藏空虛始行占據設前藏亦無人守禦賊匪亦必乘虛而入從此逐漸侵占則察多巴塘裏塘等處亦將委之於賊有是理乎保泰如此恇怯昏憤惟思率先退避以全其身而於賊匪情形從未奏及卽不能奮身打仗亦當擒一生口詳詢賊眾虛實卽雅滿泰尙知趕赴江孜防守而保泰竟安坐前藏株守不前種種貽誤其罪甚大該處孜仲堪布喇嘛占卜惑眾已令鄂輝等將首先起意之人查明辦理並將保泰革職在該處永遠枷號及伊子有官職者全行革退尙不足以蔽辜著鄂輝等到藏後將保泰喚至達賴喇嘛班禪額爾德尼前對眾眼同傳旨重責四十板再行枷號仍將諭旨內指出保泰種種貽誤緣由向達賴喇嘛班禪額爾德尼濟隆呼圖克圖及各

呼圖克圖大喇嘛等明白宣示以服其心並令保泰據實登答具奏至賊匪來藏侵擾若止因案欠起釁在邊境搶掠原不值與師大辦今竟敢擾至扎什倫布則是冥頑不法自速天誅此而不聲罪致討何以安邊境而儆遠夷耶朕臨御五十六年平定準部回部大小兩金川拓地開疆遠徼悉入版圖況衛藏爲我 皇祖

皇考戡定之地久隸職方僧俗人等胥霑醴化百有餘年况該處爲歷輩達賴喇嘛班禪額爾德尼駐錫之地蒙古番眾素所崇奉若任小醜侵陵置之不問則朕數十年來所奏武功豈轉於此等徼外么膺不加撻伐是此次用兵實朕不得已之苦心此天下臣民所共見者並非好大喜功窮兵黷武也著將前後辦理緣由通行宣諭知之○諭各省督撫文武官員請貤封者俱限年終彙奏著爲令○壬戌諭軍機大臣等吳省蘭謝升授內閣學士恩摺內

有宣批諾之謨一語其意內閣學士職司批本故用批諾二字但史冊所載如後漢之南陽宗資主畫諾係指太守不事事而言南齊江夏王蕭鐸學畫鳳尾諾係屬藩王典故均與批本無涉卽朕批閱奏摺用硃筆批寫覽字亦不謂之批諾是諾字雖係用古此處殊欠切當朕從不以語言文字責人因該學政尙稱讀書人摺內用字未妥降旨訓示伊亦不必稍有畏懼也將此諭令知之○癸亥諭軍機大臣等據孫士毅奏籌辦糧運各事宜實在盡心可嘉之至摺內稱軍行所用糧石從內地運至西藏每石需價二十餘兩若就藏地採辦卽倍價收買每石不過三兩等語若果能如此則所省至十倍尤見盡心籌覈不致帑項虛糜節經降旨不令多兵前往坐食藏米亦卽爲此孫士毅務當事事如此酌籌妥善俟明春大兵進剿時使糧餉得以源源接濟卽孫士毅一人之功

也著隨報賞給孫士毅御用大荷包一對小荷包四箇以示獎勵至口外軍糧全資烏拉運送向來官給價值土司既有從中剋扣之弊烏拉因之裹足不前或中途拋棄脫逃殊有關繫或令地方官將應付價值當面散給俾豫備烏拉之番眾咸受實惠自必更加踴躍並著孫士毅酌量辦理若土司等果能急公報效不敢暗中剋扣上緊雇備運送所有應給價值仍可發交土司轉給不必拘泥道旨孫士毅自能仰體朕心辦理俱臻妥協也○甲子諭近來大學士九卿奏事及各衙門帶領引見朕於夙興之時一經詢問卽據奏事處奏稱俱已伺候齊集朕因年高少寐每當丑寅之際卽垂衣待旦日以爲常而諸臣因請駕較早率皆先時祇候且漢大臣中多有住居城外者趨朝自必更早如詩所云東方未明顛倒衣裳殊屬無謂況目今冬月日短朕用膳辦事總在卯正以

後諸臣早集朝房亦無所事嗣後各該衙門遇有陳奏事件及帶領官員引見俱著於卯正到齊亦不爲遲以示體恤○察哈爾都統烏爾圖納遜奏蘇尼特兩旗連歲旱荒自蒙恩賑濟後雨澤如期年穀順成野外滋生楚拉啓勒甚屬豐稔比戶俱收藏禦冬各處就食者俱回家樂業臣所管戈壁內十餘臺站亦廣產楚拉啓勒該處人等所收足支來歲青草發生以前之用謹囊封進呈

御製沙蓬米詩序曰蒙古東西蘇尼特連年被旱已卽優加賑恤茲據察哈爾都統烏爾圖納遜奏前歲蘇尼特野外所生楚拉啓勒居人藉此餬口並囊貯呈覽是米內地所無詢之亦無知者恭閱皇祖御製幾暇格物編有曰沙蓬米者枝葉叢生如蓬米似胡麻而小可爲餅餌茶湯之需凡沙地皆有之鄂爾多斯所產尤多云云今詢之蒙古人與幾暇格物所言形狀悉合且東西蘇

尼特地連鄂爾多斯則楚拉啓勒卽爲沙蓬米無疑是米管之鮮
有滋味而荒年賴以全活者甚眾覽奏爲之心惻且慰因成是什
詩曰東西蘇尼特前歲遭游饑由冬至夏秋雨雪總未滋所賴沙
蓬米沙地自生斯然亦竟因旱資食邇往時聞之心惻然遣賑銀
米施天恩幸轉旋膏霽霈如期嗟嗟蒙古眾乃得免流離蓬米亦
稔熟戶戶饘粥炊呈來一試嘗例草根樹皮北望心雖慰調燮愧
自知○調松筠爲戶部左侍郎由工部調○乙丑諭國初以來設立議
政王大臣彼時因有議政處是以特派王大臣承充辦理自雍正
年間設立軍機處之後皆係軍機大臣每日召對承旨遵辦而滿
洲大學士尙書向例俱兼議政虛銜無應辦之事殊屬有名無實
朕向來辦事止崇實政所有議政空銜著不必兼充嗣後該部亦
無庸奏請○己巳諭前因潼關城垣工程巴延三德成會同勘估

時將不應添修之水關汨岸堆撥率行浮估虛糜帑項經和琳查明具奏當卽降旨將巴延三德成革任前往潼關工所眼同和琳當面講求以服其心茲復據和琳將查收潼關城工分晰刪減數目據實覈奏內如南北水關二座券洞之上止須隨城安砌排垛宇牆儘可飾觀今德成倣箭樓式掾成造於兩關添建閣樓懸挂千斤閘板每塊重五千斤非七八十人不能啓放試思水關安設閘板所以禦水而非所以禦寇卽爲防人起見平時放下適遇潼水猝至不能拽起轉致阻遏城內淹浸民居是防患而適以滋患如荊州前年之合城皆水雖下愚無知亦不糊塗若此而其上復添蓋箭樓巍峩聳峙殊屬無謂又城上建堆撥房七十二座無人看守尤爲虛設潼關在漢唐時原爲雄鎮安設重兵自不能不於城上建設堆撥今昔異勢潼關尙不如直省之一邑並無重兵在

彼駐守又安用此堆撥爲耶至自西門至東門一帶城身係依山腳建築原屬堅實從無衝決之患乃德成因有添建泊岸之舉轉將山腳刨去是從前山腳之土本堅無須泊岸以護城根而今日泊岸之土浮鬆必須挑溜以資捍禦且應時時修築矣種種錯誤實出情理之外且券洞安設千斤關一節曾經金簡在朕前奏及伊向德成講論德成以明季李自成到潼關時曾從券洞內潛過此言尤爲可笑李自成一成在明季橫行蹂躪殘破郡縣不可勝計又安能處處爲之設備此等妄論直同夢囂總之德成性成自高固執前辦理河工與阿桂意見齟齬卽其於工部同僚中素所嫉惡者莫若金簡而於福長安亦情同冰炭皆朕所素知其意以爲與此數人不和斷不能在朕前攻摘其短而伊平日又以廉介自居工程復稱爲諸習諒必爲朕所袒護故敢於勘估潼關城工一事

固執已見任意率行卽被時巴延三秦承恩俱有不必如此大修之語向其論辨而德成竟置之不顧蓋欲藉此得有沾潤以爲肥己娛老之資而舉朝大臣相視皆莫敢誰何以致營私執拗虛糜帑金至一百三十餘萬之多其居心實爲可惡德成前已革任著卽奉問令巴延三押解來京交刑部治罪巴延三旣知德成勘估過當與之講論不從卽應據實奏聞乃亦隨同附和固難辭咎但念其本係庸懦無能之人業經革任免其置議至工部堂官於德成濫行勘估之處未能指駁照估題覆亦有不合著交部議處餘仍著軍機大臣會同議奏

十一月壬申朔諭軍機大臣等據保泰奏賊人占據聶拉木定結等處不肯遵行退回一節此正極好機會昨鄂輝亦奏稱賊匪見在濟龍聶拉木等處觀望拒守看來尙未退回巢穴此時彼處大

雪封山歸路阻絕竟係天奪其魄神靈不佑故令其逗遛邊境坐待殲誅若鄂輝成德行程迅速早抵藏內已將賊匪痛殲無遺乃行走濡滯失此機會實爲可惜鄂輝成德旣已遲誤於前趁此時賊匪觀望稽留欲歸無路務當先後星速趨程奮勇前進跟蹤剿殺若能一鼓殲誅更可早期蕙事稍贖前愆儻再仍前遲誤致賊匪聞風先遁則是伊二人放走賊匪其罪尙可問乎再詳閱保泰摺內稱廓爾喀前次拘留之噶布倫丹津班珠爾及漢兵二人見已帶回巢穴看此情形或賊匪頭目已經退去因護其輜重恐被官兵追截故留餘匪屯聚該處作爲疑兵殿後以便從容竄逸鄂輝成德應察探虛實如果賊匪逗遛尙未退去則進退無路正可整頓兵力乘機痛剿若係賊人詭譎之計留此游兵冀圖官兵不能追趕自當酌量帶兵前往擒捕不可爲其所愚轉墮賊人奸計

也○癸酉諭廓爾喀賊匪滋擾後藏見派福康安帶領巴圖魯侍衛章京等統領勁兵進剿以期迅奏膚功福康安著授爲將軍海蘭察奎林著授爲參贊其餘隨在軍營及派往各大員俱著在領隊行走庶軍行有所統攝以專任使○諭軍機大臣等見令福康安前赴西藏由青海一路行走令勒保奎舒將青海眾扎薩克馬匹調撥西甯關外聽候福康安等到時乘騎朕爲辦理廓爾喀之事宵旰焦勞此時令福康安晝夜進行計限四十日卽抵藏中將彼處情形速爲奏聞朕心始得稍慰今思西甯至藏尙有三千七百餘里儻中途不換馬匹由青海直騎至藏恐馬力疲乏轉致欲速反遲著奎舒將馬匹豫備二分其一分仍於西甯關外等候俟福康安等一到卽用不至遲誤再另備一分先派委員押送至尼雅瑪善地方守候以備易換但青海一路有水草之地遠近不一

儻扎薩克趕辦馬匹一時不能全到或即將綠旗之馬通融辦理亦無不可見在勒保在蘭州無甚緊要應辦之事蘭州至西甯尙近著勒保卽速起程前往西甯與奎舒面晤熟籌妥議務期勿分畛域公同商辦再藏內摺奏向由四川一路齎送到京程途遙遠亦甚紆折雖限行六百里往還亦需五十餘日今查西甯到藏路平且近較爲便捷著勒保奎舒卽將甘肅各營及青海眾扎薩克等之馬調撥數十匹從西甯至藏界做照康熙年間之例安置驛站專爲馳送以專責成至海蘭察等帶領巴圖魯侍衛章京及調遣索倫兵一千名亦卽陸續起行由西甯前往伊等所騎馬匹及應用鍋帳等物亦著勒保奎舒豫爲料理毋致臨時竭蹶朕又思驛站事務最關緊要若僅責諸弁兵等辦理究恐未能妥協甘肅藩司景安身係滿洲且係地方大員理應隨同經理又西甯辦事

大臣衙門內見有蒙古章京可派令辦理站務著勒保奎舒卽傳諭景安及該章京等隨同福康安從西甯至青海一路妥協豫備卽留章京在彼查察景安隨福康安至藏會同該處理藩院章京將藏中回至青海沿途臺站之事妥爲安頓景安方可回任至景安起程赴藏之時所有甘肅布政使印務卽交按察使署理將此各諭令知之○丁丑諭上年高郵州假串冒徵一案係巡檢陳倚道揭報破案審辦得實彼時若將該巡檢卽爲擢用恐各省聞風效尤致起告訐之風是以未卽加恩升用但該巡檢於書吏通同舞弊之案竟能首先揭報不避嫌怨所告皆實究屬持正見在事隔年餘著該督卽將該巡檢陳倚道送部引見○戊寅諭軍機大臣等前據保泰奏廓爾喀地方有紅帽喇嘛沙瑪爾巴呼圖克圖係仲巴呼圖克圖之弟訪聞伊弟兄彼此相仇此次賊匪至藏侵

據卽係沙瑪爾巴陷害伊兄之意等語沙瑪爾巴與仲巴呼圖克圖何以兄弟竟若仇讐此語究係得自何人總未據保奏明此事殊有關繫沙瑪爾巴與伊兄仲巴舊有仇隙竟敢勾引廓爾喀滋擾後藏以洩私忿甚爲可惡而撒迦廟內喇嘛等前次向賊匪投遞哈達者亦係紅帽喇嘛顯有與沙瑪爾巴彼此勾通情弊或竟係沙瑪爾巴等欲褻黃教以與紅教故勾結廓爾喀賊匪前來滋擾亦未可定福康安到藏後務將沙瑪爾巴與仲巴何以彼此成仇及紅帽喇嘛果否欲褻黃教之處密訪嚴查相機辦理又上次巴忠到藏辦理廓爾喀一事因沙瑪爾巴欲來相見會賞朝珠段匹等物彼時沙瑪爾巴並未來藏巴忠亦未與見面所有賞給物件雖前據巴忠奏稱業經差人送給但沙瑪爾巴會否領收究無確據或巴忠於此事另有情弊故爾輕生自盡並著福康安一

併確查具奏○庚辰諭福康安前因灑帶木植一案會罰公俸十

年尙有未經扣完銀六千餘兩見令前往西藏勦辦廓爾喀滋擾

後藏一事需費較繁所有前罰公俸除交納外餘著加恩寬免以

示體恤○以汪承霈爲左副都御史

由順天府尹遷

○辛巳諭上次廓

爾喀因鹽稅細務與唐古特人等彼此爭執鄂輝成德同巴忠前

往該處查辦並不能判斷明確一切皆聽從巴忠謬爲辦理以致

復滋事端茲巴忠畏罪自戕伊二人本有應得之咎經朕格外加

恩不卽問罪仍令帶兵赴藏立功自贖鄂輝成德理應倍加奮勉

迅速趨程剋期抵藏勦殺賊匪以贖前愆今伊二人任意延緩每

日止按站行走出口多日尙未到藏節據保泰奏報廓爾喀賊匪

於搶掠扎什倫布之後尙在定結第哩浪古等處逗遛觀望未經

退回此正天奪其魄俾其坐待殲誅若鄂輝成德行程迅速早抵

藏內即可跟蹤追剿殲戮無遺乃竟滯滯不前坐失機會其錯謬甚大豈可復膺封疆專閫鄂輝著革去總督賞給副都統銜駐藏辦事仍令舒濂幫辦成德亦著革去將軍賞給副都統銜在領隊大臣上行走聽候福康安調度差遣鄂輝成德均係獲罪之人今復加委任務須激發天良勉力自贖以觀後效若再仍前貽誤必當從重治罪斷難復邀寬貸所有成都將軍著奎林補授仍在參贊大臣上行走其未到任以前仍著觀成署理俟軍務告竣奎林再赴新任四川總督員缺著惠齡補授其山東巡撫員缺卽著吉慶補授惠齡見已諭令來京陛見俟將衛藏應辦事宜面加指示後卽馳驛赴藏先在參贊大臣上行走同福康安勦辦廓爾喀賊匪事竣再同成都接印任事見在應行備辦軍需糧餉等項孫士毅悉心籌畫均極周詳仍著在彼一手經理俟惠齡事竣到任再

行交印起程來京供職其應支總督廉俸仍著孫士毅惠齡各半支領以示體恤○諭奎林從前出兵打仗固屬勇往但平日辦事往往有性情執拗失之過當之處近年以來惟在臺灣總兵任內辦事一切事件尙爲認真妥協是以疊加擢用見因派赴西藏復念伊家計維艱令管崇文門稅務並留惠倫在京代爲辦理奎林接奉後自當感激歡忻倍加奮勉嗣後辦理諸事務須痛改舊習刻自提撕總期於國家公事有益不可任意偏執致致辦理不能得當也○癸未召額勒春來京以陳淮爲貴州巡撫○丙戌轉慶成爲戶部左侍郎以額勒春爲戶部右侍郎○丁亥以特克慎爲山西按察使

由通政司參議遷

○戊子諭軍機大臣等勒保奏接准奎舒來

咨稱青海口外俱係草地時值隆冬冰雪甚大炊爨維艱牧飼缺乏勒保見赴西甯與奎舒面同商辦等語覽奏又增焦慮同日據

奎舒奏到摺內止係接奉諭旨籌辦情形而於青海出口一路難以行走之處並未奏及此事前因奎舒駐紮青海是以降旨令其會同勒保籌備妥辦今奎舒既以青海一路雪大難行如果情形屬實卽應據實具奏乃摺內並無一語轉咨會勒保並令筆帖式遠赴蘭州面稟明係意圖推諉以特旨交辦關繫軍行緊要之事其可辦與否自當直奏乃竟視同隔膜心存取巧著傳旨嚴行申飭至青海一路雖冬令冰雪較大但該處需應馬匹口糧等項俱經勒保豫爲籌備且冰雪融化卽可成水其馬草牛糞撥開積雪亦不難於檢拾應用況據勒保奏稱山路極多豈無林木叢薄海蘭察及巴圖魯侍衛章京等多係東三省人素耐寒冷索倫達呼爾兵尤係生長邊塞之地更無慮其不能在冰雪中行走福康安受朕重恩又正年力富強素性奮勉豈有海蘭察等能行之路而

福康安轉不能前往之理但朕亦不强人以所難此事特令福康
安迅速赴藏原因鄂輝成德漫無把握不得該處確實情形必須
福康安到彼將一切事宜熟籌具奏稍慰朕宵旰焦思若青海一
路實有萬難行走之勢而福康安不肯據實直陳臨期或致耽誤
是欲速反遲於此事大有關係今竟交福康安與勒保二人面爲
熟商主持定見切勿游移兩可如青海草地尙可設法行走福康
安竟當決計取道前進或將隨從人等減之又減並將攜帶行裝
另分一路隨後續行福康安卽輕騎進程以期速抵西藏朕可早
得奏報方爲不負委任此事惟在福康安與勒保熟籌定議見在
惠齡已經到京業將一切機宜面爲指示二三日內卽令起程赴
藏協同商辦務將勦辦諸事與之悉心妥酌以期迅速藏事○辛
卯諭軍機大臣等昨令軍機大臣詢問達賴喇嘛之弟羅維卜藏根

敦扎克巴據稱前年廓爾喀投順時出有永遠不犯邊界甘結係沙瑪爾巴噶布倫丹津班珠爾玉陀地方數鄉同廓爾喀頭人當面議定廓爾喀以聶拉木宗喀濟龍三處地方係他自己搶得不肯退回經噶布倫等許以每年給西番銀元寶三百箇合內地銀九千六百兩令其退還地方曾告知鄂輝成德巴忠等語噶布倫丹津班珠爾等許給廓爾喀銀兩一節實屬錯謬聶拉木宗喀濟龍本係衛藏地方被其搶占廓爾喀既經投順自應將搶占地方退還何得許給銀兩乃噶布倫等私與商議每年給元寶三百箇而巴忠願預完事鄂輝成德亦隨同附和廓爾喀藉詞搆釁復滋事端是以巴忠畏罪自盡將來事竣後自應查明治罪此時福康安抵藏後惟當督率官兵大舉深入正名討賊至於前次巴忠等許給銀兩一事不必豫爲訪查朕此時將羅卜藏根敦扎克巴所

供情節先爲諭知福康安者惟恐大兵進剿時廓爾喀或以此藉口福康安臨時不能得有主見難於措詞是以豫行降旨僅廓爾喀提及前此許給銀兩一事福康安卽不得諉爲不知總當以此原係噶布倫等與廓爾喀頭人私相定議告之巴忠鄂輝成德就事完結因巴忠通曉番語專主允行鄂輝成德不過隨同附和其辦理錯誤實係巴忠一人之罪以安其心統俟剿辦事竣再行查辦具奏再本日福康安奏到接據勒保知會馳赴西甯商辦一摺前因勒保奏青海一路冰雪較大柴草難艱難以行走已屢降諭旨令福康安酌量實在情形可以覓路行走伊自不肯舍近求遠若實有難行之處當卽改道由四川赴藏不可勉強以致欲速轉遲福康安務當與勒保從長計議與其欲速轉遲莫若以遲爲速之爲妥便也○吏部議准陝甘總督勒保奏遵旨將甘肅貴德縣

丞政設同知查通省同知五員俱分駐要缺不便裁移應於貴德特設同知一員縣丞一缺卽行裁汰從之○壬辰諭自漢唐宋以來皆有石經之刻所以考定聖賢經傳使文字異同歸於一是嘉惠藝林昭垂奕禩甚盛典也但歷年久遠率多殘缺卽閒有片石流傳如開成紹興年間所刊今尙存貯西安杭州等府學者亦均非全經完本我朝文治光昌崇儒重道朕臨御五十餘年稽古表章孜孜不倦前曾特命所司創建辟雍以光文教並重排石鼓文壽諸貞珉而十三經雖有武英殿刊本未經勒石因思從前蔣衡所進手書十三經會命內廷翰林詳覈舛譌藏弄懋勤殿有年允宜刊之石版列於太學用垂永久著派和珅王杰爲總裁董誥劉墉金簡彭元瑞爲副總裁並派金士松沈初阮元瑚圖禮那彥成隨同校勘但卷帙繁多恐尙不敷辦理著總裁等再行遴派三人

以足八員之數爲校勘諸臣等其悉心研辦務臻完善以副朕尊經右文至意○甲午調德明爲吏部右侍郎僧保住爲禮部侍郎以巴延三爲盛京刑部侍郎革任戶部尚書○庚子諭軍機大臣等阮光平寵列藩封情殷愛戴自應與在朝之王公大臣近同一體本年十二月朔朕開筆所書福字卽以賞給該國王俾得先承恩賚與該國臣民共迓春禧以示敘時錫福中外同霑之意並照諸王新年分例賞給黃鑲大荷包一對貯各色玉石八寶一分小荷包四箇金錢金鏤各二箇銀錢銀鏤各二箇又加賞白玉象一件一併發往著陳用敷將以上所賜福字荷包等物卽交鎮南關鎮目轉交阮光平祇領並恭錄此旨知照該國王用昭優眷將此諭令知之

十二月己酉諭軍機大臣等福康安一到西甯卽將青海道路訪

詢確切定於十二月初一日吉期起程前進與朕心適相符合實
能仰體朕懷克副委任嘉慰不可言喻且摺內稱近日天氣和暖
爲西甯邊地所罕見此實上天護佑之嘉兆曷勝額手感謝看
來事機順利明春大舉進剿定能速奏膚功從此得以稍舒馳廬
迂歲迎祥欣慰之餘有何可諭至勒保奎舒於福康安未到之先
將應用駝馬帳房口糧柴薪等項設法趕緊籌辦並安設臺站雇
覓熟習番子作爲嚮導福康安一抵西甯得以定期進發所辦俱
屬可嘉勒保前次議處之處卽行寬免並著加恩與奎舒一體議
敘藩司景安亦著賞戴花翎又據奏見在應用之馬匹駝隻等項
經勒保設法趕辦傳到蒙古扎薩克多方曉諭安設軍臺均已豫
備齊全等語前因達呼爾兵前抵西甯尙需時日曾經諭令勒保
等青海一路此時且無須設站安臺今青海扎薩克郡王索諾木

多爾濟等於福康安接見時據稱情殷報效該處新設臺站例有

三

屬下蒙古等坐臺距伊等遊牧地方不遠請赴各臺就近稽查等語該扎薩克等踴躍急公言詞肫切實屬可嘉特發去大小荷包交勒保奎舒轉行賞給以示鼓勵其駐紮各站蒙古官兵俱照綠旗官兵之例賞給鹽菜口糧其餘在事出力之扎薩克以上王公台吉著一併查明具奏另行分別獎賞至海蘭察等前經諭令暫駐西甯俟烏什哈達岱森保所帶索倫達呼爾兵到齊再行管領進發今福康安勒保豫備馬匹儘屬寬裕與其留存等候徒費餉飼莫若令海蘭察及巴圖魯侍衛章京等無須駐紮西甯卽於此時接續前進伊等不過一百餘人卽加以跟役人等所需騎用馬匹亦無須用至一千之多而隨後過行可期及早抵藏彼時賊匪或尙在邊界逗遛卽可令海蘭察等帶領官兵跟蹤剿殺更爲得

力計此旨到時福康安已由青海行走二十餘日該處道路情形及氣候光景自已可悉一切卽著福康安細加酌量如青海一路可以通行無阻卽飛咨勒保告知海蘭察等令其無須駐紮西甯等候官兵一同起程前進或作爲一起行走或分作數起俱無不可總以計算馬力酌量行走此事惟在福康安相度情形自行定奪咨明辦理○庚申加勒保太子太保○辛酉諭大學士嵇璜年逾八十每晨趨直策騎維艱著加恩令其乘坐肩輿以示優眷老臣格外體恤之意○壬戌諭軍機大臣等前據鄂輝成德奏請再調土兵五千名當經降旨令其再行添調土兵三千名仍著福康安通盤籌畫知會孫士毅辦理今孫士毅尙未接到此旨卽密飭德爾格三雜谷綽斯甲布共挑備土兵三千咨會福康安酌量檄調所奏適與朕旨相符至所稱續調番練二千出口時俱親身挑

驗並因數日以來未接福康安由川赴藏之信已飛檄南北兩路
將續調夫馬減撤以節糜費等事無不豫爲籌及動合機宜覽奏
深爲嘉慰著賞給大小荷包以示優眷○癸亥以陳奉茲爲江南
布政使汪志伊爲江蘇按察使

由蘇松常
鎮道憲

○乙丑諭前因保泰奏

廓爾喀滋擾後藏時扎什倫布廟內有孜仲喇嘛及四學堪布喇
嘛在吉祥天母像前假託占詞妄稱不可與賊打仗以致喇嘛番
眾等皆無固志相率散去賊匪得以乘虛占據夫扎什倫布爲歷
輩班禪額爾德尼駐錫建塔之地該喇嘛等不思竭力守禦竟敢
妄稱神言渙散眾心是扎什倫布並非賊匪所能攻陷竟係該喇
嘛等委之於賊此等喇嘛自叛其教爲王法所難宥卽佛法所不
容節經降旨令鄂輝等查明爲首之喇嘛明指其罪卽行剝黃正
法其隨同占卜之喇嘛亦應查明解京茲據鄂輝奏查明該喇嘛

等占卜者共有五人內羅卜藏丹巴一名訊取確供實係起意占卜妄言惑眾之人於審明後傳集眾噶布倫各寺大喇嘛等眼同將羅卜藏丹巴剝黃處決其羅卜藏策登等四名遵旨解京而達賴喇嘛班禪額爾德尼及濟龍呼圖克圖等皆感畏敬懷等語朕於黃教素雖愛護但必於奉教守法之喇嘛等方加以恩遇若爲教中敗類罪在不赦者卽當明正典刑斷不稍爲袒護如元季之供養喇嘛一意崇奉漫無區別致有詈罵者割舌毆打者截手之事令喇嘛等無所忌憚尙復成何政體此次辦理占卜惑眾之羅卜藏丹巴一事卽於衛護黃教之中示以彰明憲典之意著將辦理緣由通諭知之○丙寅諭軍機大臣等鄂輝奏查明後藏占卜惑眾之喇嘛羅卜藏丹巴等分別辦理一摺羅卜藏丹巴等妄託占詞搖惑眾心眾人一聞不打仗之語卽紛紛渙散不復守禦羅

下藏策登四人起意講和卽擅自差人前往賊營講說可見藏內諸事卽係伊等主持而鄂輝於辦理羅卜藏丹巴一事旣令噶布倫眼看處決又將羅卜藏策登等四人交噶布倫羈禁是鄂輝辦理藏務無事不商之噶布倫殊屬非是衛藏一切事務自康熙雍正年間大率由達賴喇嘛與噶布倫商同辦理不復關白駐藏大臣相沿已非一日達賴喇嘛係清修梵行惟知葆真養性離塵出世之人豈復經理俗務自必委之於噶布倫而噶布倫等遂爾從中舞弊諸事並不令駐藏大臣與聞及滋生事端始行稟白籲求大臣爲之經理迨至事過仍復諸事擅行以致屢次滋釁成何事體卽如上次賊匪滋事一案係噶布倫索諾木旺扎勒起釁此次係噶布倫丹津班珠爾在彼播煽生事此卽噶布倫不可用之明驗乃鄂輝見在辦理藏務仍事事令噶布倫干與積習相沿不可

不大爲整頓向來駐藏大臣往往以在藏駐紮視爲苦差諸事因循惟思年期屆滿幸免無事即可更換進京今經此番大加懲創之後自應另立章程申明約束豈可復循舊習嗣後駐藏大臣與達賴喇嘛遇有應辦事件當一一商同辦理噶布倫等與在藏章京會辦不得稍有專擅卽達賴喇嘛係出世之人不復經理俗務或慮駐藏大臣辦事不免偏私達賴喇嘛原可據實參奏朕必當嚴行懲治著福康安於抵藏後將此詳細告知達賴喇嘛及呼圖克圖大喇嘛等咸喻此意嗣後卽遵照辦理以期永綏衛藏○是歲朝鮮暹羅緬甸安南來貢○會計天下民穀數各省通共大小男婦三萬四百三十五萬四千一百十名口各省通共存倉米穀四千五百七十五萬二千五百八十一石二斗七合一勺